

甲
乙
記
政
錄

聖旨陳元麟原奏方在請議不得求去該部知道

同日

原任御史崔呈秀一本辨明心迹事奉
聖旨已有旨從公勘奏何必又辯該部知道

初九日

吏部都察院接出

聖諭日以封疆多事兵餉不充冠攘災荒時復見告
朕每覽文書深用憂惕因念朝廷設官分職賴
以宣力分猷今大小臣工布滿班列忠勤任事
豈曰乏人悠忽曠官正自不少至于章奏條陳

輒開靡冗長批覽不暇乃大利大害每擘畫不
前小嫌小疑便攻訐不已近且蹊徑岐分意見
各別愛譽憎毀附和擠排大臣顧惜身名動思
引去小臣占望風氣依違自全職業不修政事
隳廢壞我國家莫濟時艱朕思爾等叨受爵祿
自當各効功勤何乃比有立朝不思同心報國
當由紀綱不肅結黨徇私以至于此特諭誠爾
等從前咎愆悉與湔洗爾等其各滌慮深思更
新更始盡精竭誠圖大計安攘遠猷各宜悉心建
勸務使中外實心幹濟之臣得以一

意展布隨事奏効民困浸蘇閭閻安堵夷氛靖
總疆宇廓清朕得以紓憂宵旰爾等亦獲表豎
勲名若乃積習因循罔知懲艾黨同伐異徇私
滅公以致人才阻廢國是日非詎惟自玷生平
亦且上負君父朕奉祖宗成法照察不私罪狀
既明黜辱不貸決不姑息著吏部都察院傳諭
各衙門一體嚴行申飭毋得視為具文特諭

初十日

吏科魏大中一本敬剖臺臣失實之言等事奉
聖旨既有旨看議不必煩陳該部知道

同日

吏科許譽卿一本輔臣節節失禮已涉于慢事
奉

聖旨已有屢旨了日來連章求去即此便見時局且
紛紛瀆擾大非事體姑不究該部知道

同日

文選司員外郎夏嘉遇一本辯明心迹事奉

聖旨着議已有旨了不必瀆陳該部知道

同日

御史劉廷佐一本開庭無禮節非事奉

聖旨已有旨了須厝不到官向俱未糾何得借端清
獲姑不究該部知道

同日

御史李應昇一本閣臣負深等事奉

聖旨重大臣以尊朝廷關係國體這事屢旨已明
必借端輕侮且引用律條以後大小各官失
朝參祭祀應否依通行李應昇好生恣肆不
諳失體本當重處念係言官姑從輕罰俸一年
該部知道

同日

原任太常寺卿謝應祥一本臺臣詞窮妄誣事
奉

聖旨看議已有屢旨了着該部院速覆

同日

大學士魏廣微一本再懇

聖慈放歸田里事奉

聖旨卿輔弼重臣家世忠孝方期酬報何遽以浮言
求去還體朕意遵旨即出慎勿再陳該部知道

十二日

左都御史高攀龍一本麟祥普天同慶事奉

聖旨御史奏薦不當奉旨來看何不分別糾駁且併
編及各官錄非改體喬承詔還着回道考察該
部知道

同日

吏部左侍郎周如磐一本臣病已沉事奉

聖旨實錄總裁各官昨方奉旨督推不准請告周如
磐着照舊供職該部知道

同日

吏部等衙門一本臺臣論人失實事奉

聖旨陳九疇所叅謝應祥于魏大中有師生之雅素

亂朝政事屬徇私且去輔前以門牆招議今親
大中欺朕冲幼把持會推敢以朝廷封疆為師
報德好生恣肆可惡及夏嘉遇陳九疇奏揭紛
囂互生攻訐成何政體本當重處姑從輕魏大
中夏嘉遇陳九疇各降三級調外任用你每部
院大臣奉旨看議何必含糊偏庇委曲調停以
後還着遵奉新諭一體申飭行如有仍蹈前轍
朋黨結黨淆亂國是的一并重處該部院知道

十三日

大學士魏廣微一本三懸

卿氣質素清原無宿恙何乃以浮言介懷引疾
求去着鴻臚寺堂上官宣諭朕意即出佐理以
副眷倚慎勿再陳該部知道

十五日

刑科劉先春一本敬因明旨事奉

聖旨朝廷任用耆舊朕豈不知但鄒元標向係總憲乞歸扶病出城不能候朕優禮老臣加秩予告前推南部已明不必奏擾該部知道

十六日

吏部尚書趙南星一本年老智昏事奉

聖旨覽卿會推始末御史初上叅疏卿當即出一言
各官何至紛擾奉旨會勘自不公忠為人調弄
向日經筵時朕親親失儀豈望澄清吏治既年
老引咎求歸着回籍調理該部知道

同日

吏科沈惟炳一本計期甚近事奉

聖旨有請了如憫史來濟授本內辨說究與晏生
積幾本當重懲姑從輕為首的降一級調外任

用該部知道

固

丈書房傳出諭內閣

聖旨朕思股肱心膂休戚相關政體殷煩需才協濟
今海內凋敝疆土未寧卿所遇何時所居何任
豈可顧惜身名勉興歸念藉一二浮言苛語輒
欲息有卿自為計則可縱非平昔期許之心更
非朕倚毗眷注之誼前已着鴻臚寺官宣諭朕
意望卿佐理不啻飢渴之于飲食昨覽卿奏謝
知卿疾少瘳朕心欣慰不已卿當仰體朕懷亟

出視事特諭卿知

同日

大學士魏廣微一本恭謝

天恩事奉

聖旨覽卿奏謝朕知道了好望即出慎勿遲回該部知道

同日

兵科王鳴玉一本請停貢例事奉

聖旨該貢例暫開有無空罅着吏戶二部酌覆制勅兩房官俱係考進升授例不援納張邦經講惟

聖旨不允請求三品俸官免坐轎例着通行申
務該部知道

十七日

文選司主事程國祥一本負罪乞休事奉

聖旨吏部知道

同日

左都御史高攀龍一本愚臣失職事奉

聖旨竊憲風紀重臣自當秉公執法卿既無欺何又
師生偏庇不肯從公會看又旨意內冲幼字樣
任情那改大失敬慎非欺而何既求罷斥着准

回籍該部知道

十八日

御史周昌晉等一本聖度惟在優容事奉

聖旨既有旨了何必又來瀆擾為首的罰俸一年該
部知道

同日

大學士韓爌等揭帖奉

聖旨覽卿等奏優禮大臣朕豈不知但我

雖係舊臣會稽韓爌原非為師生植究比者今眾臣
聖度臣等所稱依違全無公論只知有情面而

不知有朝廷或垂廟時必不耶如此其沈惟炳
安遠退臆降朝臣示薄懲周昌首跡語微平是
以姑從輕處朕前已有諭旨着部院一體申飭
卿等心膂重臣不必挺身救解亦不可過生猜
忖致滋煩擾紛囂還遵前旨行該部知道

十九日

大學士魏廣微一本欽奉宣諭事奉

聖旨覽卿奏謝不日入閣朕慰知道了該部知道
同日

原任太常寺卿謝應祥一本部覆已明事奉

聖旨既屢疏辭准照部覆回籍員缺另行推補該部知道

同日

吏部郎中張光前一本恭繹明旨事奉

聖旨司官原無言責張光前方纔到任供職如何輒來瀆擾姑不究部院員缺公慎會推不得預先猜忖該部知道

十月二十二日

吏部都察院接出

張諭朕紹承大統四歲于茲值軍旅頻興封疆未謐

無天災踵至歲事不登致海內蕭條民生重困
并望君臣一體上下同心登進仁賢講求兵食
英中國以禦夷狄修人事而補天工朕每食寢
弗寧焦勞罔恤未得安攘之道乃爾儕大小臣
工庶坐享國家之祿靡懷君父之憂內外結連
答應呼吸盤據要地把持通津念在營私事圖
顛倒誅鋤衆正朋比為奸欺朕幼冲無所忌憚
通年以來恣行愈甚忠貞皆為解體明哲咸思
保身將使朕孤立而后快其罔上之心抑思人
盡絨口然後滿其無將之願歟朕前已有特諭

徇極詳明如何大小群工視若弁髦全不遵信
幸天啓朕心豁然頓明近御史陳九疇會看議
本乃國是攸關輒任情軒輊法紀所係謬為調
停統均之道既乖風憲之猷更失因思此輩從
前所為皆是欺瞞但遂營謀之私不顧肺肝之
見今元兇已放羣小未安或公為党救或妄肆
猜忖本為根株盡拔徹底澄清念玉石猝未能
辨雷霆詎可驟施諭爾徒衆姑與維新洗滌腎
腸脫換胎骨果能改圖仍留任用如有怙其稔
惡嫉夫善類甘為搢縱之鷹犬罔慮貽遠之禍

惠朕將力行祖宗之法決不製姑息之政矣凡
茲百辟咸使聞特諭

同日

吏部一本印信事奉

聖旨印着陳于廷暫署尚書并左都御史員缺不拘
在朝在籍資望深重的多推三四員來看吏科
都給事也着從公推補該部知道

二十四日

都察院經歷朱明時一本懇乞

聖明事奉

聖旨員缺已有旨推補著便多舉幾員來看該部知道

同日

考功司郎中鄒維璉一本自請罷斥事奉

聖旨既引罪求罷著他去該部知道

同日

吏科許譽卿等一本老成可惜事奉

聖旨既已有屢旨了如何又來瀆擾為首的降一級

調外任用該部知道

同日

吏部一本欽奉

聖諭會推吏部尚書喬允升馮從吾汪應蛟奉
聖旨吏部都察院濁亂已久大非祖宗故立初意朕
已屢諭更改如何此次會推仍是趙南星擬用
之私人顯是陳于廷楊漣左光斗鉗制衆正抗
旨徇私三兇既倡率于前誰敢不附和于後又
會推職名都察院不曾全列况近日楊漣既曾
親接聖諭今值會推之日豈可佯為不知怙惡不悛
註籍躲閃又前與高攀龍會看陳九疇之事黨
比不公頗屬楊漣左光斗主張而乃了不引咎公

然欺朕幼冲真巨猾老奸冥頑無耻陳于廷前
奏從來會推吏科河南道槩與畫題袁化中不
無扶同情弊陳于廷楊漣左光斗俱恣肆欺
瞞大不敬無人臣禮都著革了職為民仍追奪
楊漣左光斗誥命計典期迫吏部即將堪推尚
書都察院的不拘見任在籍多會推六七員或
七八員各開寫履歷職名來看該部知道

同日

吏科一本請信事奉

聖旨部著吳張業署掌都給事中員缺已有旨從公

推補該部知道

同日

吏部一本會推有日事奉

聖旨知道了着遵屢旨各推堪任的幾員來看

同日

吏部一本缺官事考功司缺郎中推原任驗封

司郎中呂維祺奉

聖旨着另推幾員來看

二十九日

禮部侍郎趙秉忠一本危症已無起色事奉

聖旨趙秉忠假滿當即前來供職乃引疾乞休情詞
懇切念係日講官着加禮部尚書致仕該部知
道

十一月初一日

吏部一本缺官事山西缺左布政推原任四川
左布政周著奉

聖旨員缺着另推來用

初二日

御史袁化中一本乞恩認罪事奉

聖旨既認罪求罷着降一級調外任用該部知道

原自

吏部郎中張光前一本據實認罪事奉

聖旨既認罪求斥著降三級調外任用該部知道

同日

大學士魏廣微揭帖奉

聖旨覽卿奏入閣辦事朕心嘉悅知道了該部知道

初四日

諭內閣

聖諭朕覽李魯生本內會推武臣一節切中時弊則
從前會推文臣可知又所言四事前擬止及其

三朕思各部擬票不知應元輔經思耶抑次輔等或間亦協贊一二也前時鴻臚寺起數宜票與否卿等所知及至批行遂爾外廷噴噴近日巡視科道本內云嚴行相視乃擬擬領埋且乞討有與者乞進侯爵者卿等應之如響朕倚毗藉賴平章謂何追念去輔在時或未屑越年并至此自今以后卿元輔還當同寅協恭集思廣益卿等亦勿袖手坐視伴食依違必大家殫力共期于平治仰副朕心齊注保安宗社

臣民特諭

同日

御史房可壯一本會推負罪事奉

聖旨既認罪著降三級調外任用該部知道

同日

大學士韓爌揭帖奉

聖旨卿體力清強偶感風寒准給假調理吏部知道

同日

吏部左侍郎周如磐一本披瀝悃誠事奉

聖旨部務煩重周如磐著速出署印

初五日

史科吳弘業一本會推引咎事奉

聖旨吳弘業著照舊供職該部知道

同日

刑部尚書喬允升一本積勞成病事奉

聖旨卿掌邦禁勤慎明允著即出供職不准辭該部

知道

初九日

吏部一本會推至丞等事奉

聖旨會推難緩著即舉行其掌河南道御史員缺仍

候本院題補

同日

應喚巡撫趙起元一本舊病舉發等事奉

聖旨朱童蒙不准告病並前例轉官郭允厚李春燁
皆係建言排擠都著起陞京堂用該部知道

初十日

吏部等衙門會推吏部尚書李宗延趙彥准景
榮李起元陳通亨王在晉王永光鍾羽正

同日

河南巡撫程紹一本藩司引義乞休事奉

聖旨郭尚友心迹既明入覲期迫著留用吏部知道

十一日

吏部一本欽奉

聖旨事奉

聖旨崔景榮仍以太子太保起吏部尚書着速催前來供職不必例辭會計期迫都察院乃緊要衙門若復會推恐滋耽延日期是以一併點用李宗延改吏部尚書掌都察院事趙彥素有才望但軍國重務正藉壯猷不便改用

同日

兵部接出

聖諭遠在論本乃

皇祖以來三世之耻朕常痛恨于心督師輔臣孫承
宗既膺重任駐守榆關一身所係宗社安危茲
覽所奏知遠探已至益州登撫曾見虜騎柰何
未奉明旨親歷薊遼且以朕壽節為名欲入亦
隨班申賀又以為糧餉不接欲面與該管商量
往返之間須廢時日寧不啓夷虜窺伺之狡謀
致沿途百姓之驚駭兵事不可踰度固老成詳
慎之體然無旨而擅離信地非祖宗法度所容
况三朝仇耻乃不共戴天之大義壽節躬賀乃

平常臣子之儀文緩急重輕明白易曉倘中途
有意外之變關門有倉猝之虞其一應相機調
度將屬誰乎爾兵部即馬上差人傳諭樞輔馬
首速東亟還山海候犁庭掃盡恢已失之封疆
斯飲至策勲著荒度之偉績就或真有密計何
妨便宜封進以聞朕志以滅奴為期必不從中
牽制爾部即宣布朕意慎勿再有托陳該部知
道

十一月

刑部尚書喬允升一本感激天恩事奉

聖旨覽奏知道該部知道

十和月

戶科陶崇道一本令節聖壽筵席事奉

聖旨朕勵精獨斷有何旁蹊引唐宋末季為言陶崇道不諳事體本當重處念係言官初任姑降二級調外任用吏部知道

同日

吏部一本缺官事奉

聖旨據推吏科都給事中四員止一人在京還再推幾員來看河南掌道御史着都察院多推幾員

點用以襄計典該部院知道

二十日

戶科陳良訓一本

聖壽萬國歡呼事奉

聖旨朕每事必遵祖制陳良訓如何瀆擾本當重處姑降三級調外任用吏部知道

同日

錦衣衛賂思恭一本臣病未痊事奉

聖旨賂思恭侍衛有年勤勞茂著既告病懇切准辭

徐調理該部知道

二十一日

大學士韓爌一本奉

旨無狀事奉

聖旨卿親承顧命當矢躬盡職何乃歸罪于上退有
后言朕已隱忍不宜卿當清夜自審今復怏怏
偉偉忠義何存既引疾求歸着馳驛回籍該部
知道

二十二日

刑部尚書喬允升一本

國恩未報事奉

聖旨前已有旨慰留今正獻倖追贓事體重大耳即
出供職以副朕懷吏部知道

同日

吏部一本缺官事文選司缺郎中推原任郎中
范景文奉

聖旨着點了的用選法壅滯速到任供職

又一本冒罪乞休事復文選司程國公致仕

二十三日

兵部侍郎李邦華一本愚臣感寒劇病思親事

奉

聖旨李邦華三疏乞歸且思親成病准回籍調理吏部知道

二十五日

兵部一本缺官事奉

聖旨田爾耕著本衛掌印管事提督東司房官旗寫勅與他

二十六日

吏部一本缺官事奉

聖旨許宗禮調補吏科都給事中

同日

刑部尚書喬允升一本乞

恩寬假事奉

聖旨准暫假調理即出供職該部知道

二十八日

吏部等衙門會推戶部缺尚書推李起元陳所
學都察院缺副都御史推喬應甲薛鳳翔缺僉
都御史推王紹徽朱欽相南京禮部缺侍郎推
林欽楫李孫宸國子監缺祭酒推李思誠錢謙

益

同日

原任南道御史呂鵬雲一本微臣久病事奉
聖旨朕查近來例轉考察在籍各官多有為人排斥
的好生不公呂鵬雲不准告病并徐大化孫杰
都着升京堂用給事中羅維華王志道郭興治
御史徐景瀛賈繼春楊維垣俱着復起原官催
來到任吏部知道

二十九日

原任兵部尚書崔景榮一本久苦衰病事奉
聖旨銓衡重任卿端亮公清特茲起用且計期甚迫
澄汰需人不允所辭著作速前來供職慰朕延

佇之意文選考功司郎中都催于十五日前赴任不得延遲候事吏部知道

十二月初三日

吏部等衙門會推吏部右侍郎徐兆魁薛貞禮部右侍郎何如寵孟時芳兵部左侍郎劉遵憲張廷登南京戶部尚書陳所學周希聖山西巡撫柯臬吳應琦正推有點

初六日

吏科給事中郭興言一本敬因督臣之疏事奉聖旨王三善死事可憫委當優卹道將候事平另議

裁都重慶功次并議叙履張我續准以原官起
用楊述中也旨了該部知道

初七日

南京大理寺卿李本固一本衰病不堪事奉

聖旨李本固准在籍調理吏部知道

初八日

御史周昌晉謹

題歲序將終事奉

聖旨這本說的是向來濁亂朝政的朕已將渠魁屏
斥其餘姑與維新登進人材方今急務當次第

舉行移宮進藥事跡自明著宣付史館從實紀載爾每大小臣工務宜秉公持正振起積愆輔佐中興該部知道

初九日

吏部一本缺官事奉

聖旨周如磐仍以太子賓客填補吏部左侍郎兼翰林院侍講學士徐兆魁起陞右侍郎

初十日

太僕寺少卿胡琳一本奉

鑒陽縣等事奉

聖旨翰林既有疾准在籍調理吏部知道

同日

保定巡撫程正巳一本積勞成病事奉

聖旨程正巳既有病准回籍調理吏部知道

十三日

禮科顧其仁一本叙功業奉

明旨事奉

聖旨本內楊述程川功准優叙徐紹吉遇缺推用劉
時俊急難不前縱子作弊朕姑置不問顧其仁
豈實不知顯是曲徇情面且不深究該部知道

十四日

大學士朱國禎一本懇

恩休致事奉

聖旨卿忠勤輔政朕所鑒知倚毗方殷猶為未竟豈
得以浮言遂萌歸志即出佐理以副朕懷該部
知道

同日

吏科吳弘業一本西南困敝已極事奉

聖旨卿已育旨何必借端瀆奏推官正陪無列以
僭黷用係祖制舊章朕昨點出雲貴司官偶及

陳體素出獄公有何疑猜吳弘業曲盡鄉情持
奏請改本當重廉姑從輕罰俸三月該部知道

同日

兵部一本題為死難撫臣事奉

聖旨王三善剛愎自用不聽總督節制致敗即有解
圍之功不償其罪殞身尚未的確加卹大興俟
事平勘明另議楊述中老成不必行勘著即起
陞京堂用該部知道

十五日

原任左副都御史馮從吾一本辭免重任事奉

聖旨卿清望素著特簡司空方切倚任覽奏情詞懇切准照新銜致仕以成高尚該部知道

十六日

御史張訥一本

聖明震勵銓政事奉

聖旨這本說舊銓臣罪狀欺天罔人深可痛恨其引用私黨匪人看張訥逐一指名回將話來南御史王允成無端突改北道臺綱何在并那維連程國祥夏嘉遇調部亦壞成規都着為民當差有司不得情庇梁夢龍既被禮部批駁如何優

鄧顯是徇私文一過是缺動索千金贓私狼籍
充塞滿途媚此罪狀即削奪亦不為過今冢臣
泣事方新亟宜盡反穢政力消偏黨以贊中興
吏部知道

同日

戶部一本奉

旨回話事奉

聖旨游士任募兵尅餉擅自回籍并奸弁孟淑孔張
思任久拿不到成何法紀都着錦衣衛差的當
官旗扭解來京究問其何棟如侵冒兵餉還着

該部查明回將話來

十七日

禮科李恒茂一本條陳壅滯事宜備述前因事
奉

聖旨京堂壅滯已極勢當設法疏通年老的議回籍
科道吏部三衙門循例久任不得速轉巡撫內
外兼推俱係祖宗成法着該部即與覆行

同日

左通政涂寶榛一本親老身病事奉

前奉旨樣既有病准回籍調理吏部知道

十九日

應天巡撫周起元一本道臣聞議事奉

聖旨周起元曲庇楊姜屢悖明旨今又誣劾朱童蒙顯是排擠正人好生抗違無禮本當重處姑着削職回籍吏部知道

二十日

大學士朱國禎一本病劇難痊事奉

聖旨時事多艱卿為首輔贊襄密勿老成忠慎倚任方殷乃連章控陳情詞懇切難以強留著加少傳兼太子太師戶部尚書武英殿大學士廕一

子與做中書舍人仍遣行人護送馳驛歸里加
賜銀一伯兩彩段四表裏大紅紵絲坐蟒一襲
地方官不時存問月給廩米五石與人夫八名
稱朕始終隆眷至意卿還善自調理以需召用
該部知道

同日

刑部尚書喬允升一本臣病萬分不支事奉

聖旨卿掌邦禁慈惠明清方深倚賴乃遽疏求歸情
詞真懇准回籍調理病痊起用仍與馳驛去該
部知道

同日

兵部侍郎孫居相一本陡患沉痾事奉

聖旨孫居相引病求歸情詞甚切准回籍調理該部知道

二十二日

吏部尚書崔景榮一本敬陳用人事奉

聖旨近來人情貪競吏治不清皆由不遵職掌先年會推各衙門不得干與要在平日發單咨訪才品周知有缺照單推用一切請托悉置不行躁競之風自息例轉科道都察院不得與聞惟推

陞科臣選郎商之吏科推陞道臣都察院各有舊規何得踰越以滋築舍一切推陞才望資俸並論別久任不可不行惟邊道提學雖有定序祖宗成法亟宜嚴加申飭與內外臣工畫一遵守以清吏治該部知道

同日

御史梁夢環一本計期伊邇事奉

聖旨計典三年一舉法當嚴緊其貪橫異常者不問甲科鄉貢一體盡法嚴治有曾經叅論降調久不到部者顯是觀望夤緣即宜一體勿除考選

遐邇兼收如川屬滇黔遠吏拮据勞苦與近
地迥別何得以其路遠聚置不選以前部院諸
臣自取斥逐皆繇汪文言輩肆譏惑聽以致貞
邪混淆即廷杖豈盡其辜還着錦衣衛差的當
官旗扭解來京窮究以清禍本四方遊棍仍有
來往村舍踪跡可疑者緝事衙門嚴拏正法不
得疎縱該部知道

二十三日

御史張訥一本奉

旨指名回話事奉

聖旨張訥回話的是許念敬着錦衣衛差的當官旗

扭解來京究問潘一鳳周卿王鍾龐趙洪陽

着該地方官提問史記事李炳恭丁元薦賀煊
沈應奎仍照察典革職回籍王元翰吳爾成冠
帶閑住毛士龍照舊為民李邦華已准告病今
着閑住孫鼎相魏雲中施天德俱回籍聽勘張
邦經革任閑住其餘姑不深究該部院知道

二十四日

戶部右侍郎鄭三俊一本風疾增劇事奉

聖旨鄭三俊情詞懇切准回籍調理吏部知道

國月

翰林院侍讀繆昌期一本患病不能供職事奉
聖旨繆昌期着冠帶閑住吏部知道

同日

吏部一本欽奉恩詔事奉

聖旨歐陽調律任淺不准誥命其餘各官俱准給

二十五日

兵部接出

聖諭大慎馬房提督御馬監太監趙剛着南京孝陵
神營監太監掌印寫勅與他該衙門知道

二十七日

南京禮部尚書李維禎一本年老病侵等事奉
聖旨卿宿學望重簡任方新乃覽奏情詞懇切准馳
驛回籍以成高尚吏部知道

二十九日

兵科李魯生一本直披邪撫抗

旨除正之罪事奉

聖旨聖道昭如星日人臣學古入官豈官成後尚待
講求近日乃有假道學之名號招黨類群聚營
私貽害非小這都城書院便着部院議妥改作

公廨本內有名科道阮大鍼等十二人終養
病的即與起用例轉的仍補科道速來供職其
重慶府推官汾陽知縣王建泰等二人既以無
罪被察准陞部屬用周起元黨邪排正已有旨
了該部知道

計開

徐大化并楊維垣阮大鍼陳滿翌張素養
李應薦李嵩楊春茂高弘圖王大年張捷
馬逢臯

同日

御史崔呈秀一本特恩自天事奉

聖旨崔呈秀被誣事情公論久明豈待行勘著作速
回道會事以后奉特旨起用的不必瀆擾該部
知道

天啓五年正月初九日

戶部主事談世講一本微臣被劾事奉

聖旨談世講應否外官考察該部院查明具覆

十三日

吏部一本微臣被劾一關京兆事奏主事談世

講世后考察議處奉

聖旨欽此講進臆奏異迹察典既經部院查明從重處治

十九日

兵科陳維新一本聖旨莫先用人事奉

聖旨這行取即于計完舉行內外官俱着正月十五截俸餘俟部覆酌議行王象春窮兇極惡黨邪害正本當重治姑從輕革職為民當差仍追奪誥勅該部知道

同日

吏科給事中許宗禮一本遵例糾拾方面事奉

聖旨這本說施天德行賄汪文言二千兩待文言擎到一并嚴追以彰法紀該部院知道

二十一日

工部侍郎吳仁度一本風疾增劇事奉

聖旨吳仁度簡任司空涖任未久乃即請告情詞迫切准回籍調理

二十四日

吏部一本欽奉

聖旨追奪楊漣左光斗等誥命等事奉

聖旨知道了

吏部一本糾拾方面事奉

聖旨施天德等着冠帶閑住翁登彥等俱依擬分別
降調劉復初照年老例以原官致仕

同日

大學士顧秉謙揭帖奉

聖旨朕覽卿奏查省吏部三衙門于二月二十八日
例有歲轉祖宗朝皆有添註但遇年徇情濫轉
甚無限制自今以后先卿所請每歲科止陞二
人道止陞四人吏部司官止陞二人其科中閏

轉道中邊功俱行停止吏部知道

二十五日

原任太僕寺少卿劉宗周一本

天恩逾重事奉

聖旨劉宗周渺視朝廷矯情勵世好生恣放著革職
為民當差仍追奪誥命吏部知道

二十六日

禮部左侍郎何如寵一本臣職當盡臣病難痊
事奉

臣職當盡臣病難痊
未完聖旨催督何如寵告病顯屬規避著

孫冠帶閑住吏部知道

同日

兵科李魯生一本改書院祠忠臣大昭勸懲事
奉

聖旨書院改作忠臣祠這本說的是通查文武死難
諸臣一體並祀以勸忠義該部知道

二十九日

原任吏部侍郎曹于汴一本身病才疎事奉

聖旨曹于汴以才望起用乃請告情詞迫切准在籍

調理吏部知道

三十日

吏部一本缺官事奉

聖旨李養質職年太多事屬欺罔該司官着回將話
來

同日

南京兵部尚書陳道亨一本久病沉痾事奉
聖旨卿碩望鴻猷留樞方膺簡任何乃連章情詞迫
切准回籍調理仍着馳驛去該部知道

二月初三日

尚寶司卿姜志禮一本奉

清姜志禮著加銜致仕吏部知道

同日

吏部接出

聖諭朕覽各省試錄有湖廣山東江西福建策問內
指語言粗狂任情恣肆兼有詆毀朝政譏刺朕
躬逞詭譎之詞是非任其顛倒縱雖黃之口誣
蟻罔所顧忌皆因彼時大誦巨奸招權納賄主
持于中故各省考官願指占風附會朕思邊疆
未復黔省未寧正君臣勵精求治之時亦士子
據忠吐竅之日舍實政而勿詢徒黨人之是悅

壞作人之盛典矣祖宗之美意好生可恨難以
姑容傳諭吏部即將正副考官八人都着降三
級調外任用聊布解網之仁用作維新之路故

諭

正副考

方達年熊奮清
章光儒李維貞

丁乾學
郝士青

顏錫爵
董承業

初四日

文選司員外郎孫光顯一本回話事奉

聖旨選司檢點不明職任何在為首的降一級調外
任用其餘各罰俸三個月

初五日

御史楊維垣一本考選之數等事奉

聖旨是考選既有額數該管衙門當自矢公矢慎務
求才以實用本內徐景濂等十餘人暨給假請
告在籍的便作速填補催來赴任吏部知道

同日

大理寺寺丞徐大化一本

政適當更始事奉

有這本說的是恢復大計要在簡將練兵賞罰嚴
明委任樞輔自能相機進止近來紀綱不振全
是欺君植黨輩盤據要津招權納賄楊漣左光
斗其尤侯汪文言逮至審明追駐都民所苦由于

僉報商人不公
選擇風力科道官管班勿徇
情面其
未便署廠衛嚴行緝捕正法食糧應
留設官監發該部議奏人才摧折廢棄已久何
能祥王永光遇南北大僚缺速用申用懋遇遙
撫缺用朱一桂陸卿榮王伉秦聚奎汪慶百徐
揚先郭鞏劉廷宣邵輔忠姚宗文范得志俱以
原官起用速催赴任舉人童學賢既無關節准
令科會試其餘奸黨已有旨了姑不深究該衙
門知道

初八日

御史劉廷佐一本愚慙自期貶斥事奉

聖旨考官錄文恣肆已降處示懲舉人又都輕罰了
劉廷佐如何輒來黨救
日外支故犯皇祖
御諱好生不敬本當重處姑着降三級調外任
用吏部知道

十一日

原任南京吏部尚書余茂衡一本自揣衰庸不
堪任用事奉

聖旨卿以風望起在留銓方資澄叙乃具疏控辭情
詞真懇准在籍調理吏部知道

同日

山東巡按魏光緒一本鄒滕已久無譴事奉

聖旨充東兵荒之后拊綏彈壓豈可一月缺官著即
與陞調填補郭人吉曾經察處招撫何功魏光
緒職在察吏却徇私列薦顯是欺誑著降三級
調外任用郭人吉為民當差該部知道

十九日

南科楊棟朝一本糾劾冒濫京堂事奉

聖旨本內王之臣頗閑兵畧方需擢用這糾劾冒濫
臺跡無名豈為公論姑不究該部知道

二十日

工部主事門洞開一本敬循職掌直糾陰臣等
事奉

聖旨這本說徐在中買銅剋銀數萬兩又扣造硝磺
三眼明甲商人價銀受各商賄賂賍私狼籍皆
有証據先輩了職聽勘明嚴追本內積商神棍
沈允度即董全田尚沈惟祿許志升過付人
徐心葵都着錦衣衛拏送鎮撫司究問具
奏軍器歸二廠打造着遵前旨行該部知道

二十三日

南京戶部右侍郎南企仲一本沉痾不支事奉
聖旨南企仲請告情詞真切准在籍調理病痊起用
吏部知道

同日

山西巡撫劉策一本天恩隆重事奉

聖旨劉策告病情詞真切准在籍調理吏部知道
二十五日

刑部一本奉

旨回奏敬陳職掌事奉

聖旨陶朗先駐罪昭然有何難問這奏內說問官有

事何不易委明是支吾成何法紀即着饒伸王
之來二官問明照原叅駐數立限追完用濟遼
餉如再延緩責有所歸

同日

河道總督朱光祚一本微臣日就等事奉

旨卿才猷素著河道正賴疏通乃告病情詞真切
准回籍調理着馳驛去該部知道

二十六日

東廠一本訪據事奉

聖旨李承恩身為戚臣不遵法紀僭服赭色并違禁

龍衣又倩勢打死人命積惡多年好生欺藐着
東廠嚴刑究問具奏

同日

御史楊維垣一本憮臣非分之酬事奉

聖旨皇祖慈愛皇考孝友中外臣民共知張差一事
王之案貪冒進取上誣皇祖并負皇考且陷朕
不孝又致斃內外無辜多命身職顯官拊心何
忍本當下獄究問始從輕革了職為民當差還
追奪誥命該部知道

三月初三日

工部主事曹欽程一本

聖治章已一新事奉

聖旨這本說的是周宗建作令賄聞及鑽入言路薦庇多私引其黨沈萃禎以貪險躡致叅藩又欲引吳煥為接手立倡建私學于都城之內尤屬不法張慎言倚薦趙南星為首功避差謀差任意鴟張同臺安伸竟遭毒手先任曹縣侵盜庫銀三千兩恨后任石三畏查出遂捏單劣嚴王官李應昇專為東林護法排擠正人亟引高攀龍以四年前一典史驟躋總憲遂藉奧援欲攘

北直提學黃尊素以汪文言倖冒臺班即薦座
師鄒維璉于趙南星破例得入吏部一味搏擊
善類以助高攀龍魏大中之虐焰此四臣者招
權納賄黨邪徇私目無國憲都着革了職為民
當差還追奪誥命內周宗建張慎言賍私狼籍
彼處撫按提問追賍具奏不許庇護沈萃楨吳
煥俱着降三級安伸仍以原官起用吏部知道
初五日

錦衣衛千戶哈祿一本計期伊邇直陳愚見以
補大典事奉

駐私具奏

同月

奉

旗照例年終併叙該部知道

初六日

刑科霍維華一本言路關係甚重事奉

聖旨這本條陳考選鑒鑒可行准將見任諸臣選四十名其汪文言代久鑽謀著鎮撫司一并究問劉璞徐世業黃公輔萬言楊盧化鰲都著革了職為民當差仍追奪誥命玄默等著吏部分別選用該部知道

初八日

南京戶部左侍郎林學曾一本

聖恩未報臣病難痊事奉

聖旨林學曾素有品望茲當考滿引疾求退恬志可

加着陞戶部尚書致仕照例廕一子給與新銜
誥命吏部知道

初九日

吏部一本缺官事四川缺叅政推吏部郎中張
國紳福建缺副使推兵科朱大典四川缺叅議
推刑科薛大中陝西缺叅議推御史周汝弼四
川缺僉事推御史翟學程浙江缺副使推御史
陳保太廣東缺叅議推御史胡良機俱奉

聖旨是有點的用

同日

錦衣衛王崇儀

旨回話

聖旨於... 孔嚴刑

... 張思

...

...

聖旨... 官調用楊

廷銘... 相用

十二日

太常寺卿鄒德泳一本遵

旨自陳事奉

聖旨鄒德泳加刑部右侍郎致仕吏部知道

十四日

大學士顧秉謙等一本為纂修實錄事奉

聖旨實錄關係甚重這推補各官俱看上緊任事張
禹詐病要名養資驕慢又先年跡內洗補字樣
失填好生欺侮大不敬無人臣禮着革了職為
民當差仍追奪誥命即另擬一員來用吏部知
道

十六日

原任南京兵部郎中葉大受一本

聖明睿照日新等事奉

聖旨王允成受賄囑托懷恨誣議諸司又不該辯所
據單詞復覈情弊顯然葉大受不必行勘着以
原官起用吏部知道

同日

吏部一本直拔邢撫等事復起補吏科陳胤叢
禮科陳爾翌各給事中山東道李嵩山西道高
弘圖福建道張捷山東道馬逢臯貴州道楊春

茂雲南道張養素各御史奉

聖旨王建泰張九賢着照前旨北部用

十七日

太僕寺卿黃龍光一本遵

旨自陳事奉

聖旨黃龍光准致仕該部知道

北鎮撫司一本計期伊通直陳愚見事打問過
犯人汪文言送法司奉

聖旨據汪文言招稱甘肅巡撫李若星用銀五千五百
兩謀得前缺便着革了職為民當差仍追奪誥

命本內一切贓私尚有含糊不明的還着許顯純嚴刑究問務要逐項指出何人收受確招具奏鎮撫司一本奉

聖旨楊漣左光斗袁化中魏大中周朝瑞顧大章都着錦衣衛差的當官旗扭解來京同汪文言一并究問追贓其本內受贓各官趙南星等十五員除已經削籍外餘俱削了籍着撫按提問追贓具奏不得徇情庇護

十八日

御史崔呈秀一本國家欲求保泰之策事奉

聖旨這本說的是選將汰兵該部具奏魏忠賢捐貲
修城急公可嘉着與王繼謨一體叙錄忠賢仍
于本縣建坊賜勅旌獎廕第姪一人與做都督
魚事賞銀三十兩紵絲二表裏羊二隻酒三十
瓶新釵三十貫其藍屯鑄錢事宜該部覆議行
汪心淵着彼處撫按嚴提追贓劉賁卿徐日久
俱重褫斥以警將來樞輔去留關係重大候九
卿科道會議已有旨了該部知道

二十二日

御史王大年一本

聖治維新事奉

聖旨本內薦舉諸臣並以原官起用謝啓光改北大
理寺寺丞薊遼重地吳用先不堪總督着革任
冠帶閑住即推才能有邊畧的用吏部知道

同日

南京工部右侍郎葉茂才一本舊疾陡發事奉
聖旨葉茂才准回籍調理吏部知道

二十三日

吏部一本缺官事奉

聖旨萬嗣達在西城駐私狼籍殘害多人不准陞任

着革職為民

同日

戶部薛國觀一本直糾漏網貪弁事奉

聖旨游士任侵冒餉銀盡屬胡維寧經手着錦衣衛
扭解來京究問熊明遇鑽謀憲臣又黨庇士任
力為求解姑着革職聽勘該部知道

同日

錦衣衛一本欽奉

聖諭事遵旨將犯人許念敬拏到奉

聖旨是許念敬着鎮撫司與汪文言一并究問追贓

同日

又一本直糾漏網貪弁事奉

聖旨胡維寧向在城內查係窩匿誰家今始等到著
鎮撫司與游士任一并嚴究追贓具奏

二十四日

太常寺卿侯執蒲一本遵

旨自陳事奉

聖旨侯執蒲着致仕吏部知道

同日

太常寺卿程啓南一本遵

旨自陳事奉

聖旨程啟南着致仕吏部知道

二十六日

內閣顧秉謙等揭帖奉

聖旨陶朗先匿贓不吐板害無辜刑官未經奏請擅
拏勒契以致商人閉門逃遁成何法紀該司官
姑不究着即曉諭諸商各安生理退還文契贓
銀仍于本犯名下嚴追務要速完

同日

吏部一本會推致有辯駁事奉

聖旨蔡復一已經敗挫着回籍聽勘朱燮元准以原官往代其任黔省孤弱必借蜀滇協濟相機勦撫黔撫蜀撫作速推有幹濟的來看其總督駐劄節制仍確議具奏

司日

刑科周之綱一本懲貪功令已嚴事奉

聖旨各省直掣問貪官比限追贓徐清貪淫尤甚着行該撫按嚴加窮究其私掠貴州子女審明具奏胡維寧已有旨了張思任久掣未到務在必獲以彰法紀該部院知道

同日

錦衣衛一本奉

旨回話事奉

聖旨吳孟明窩藏欽犯本當拏問姑從輕着削了籍
為民當差其胡維寧贓私寄頓在駱延衷徐士
翹家并着嚴拏究問追贓

二十八日

大理寺少卿韋蕃一本簡因尚肆逋事奉

聖旨昨輔臣說韋蕃在朝房訐問曾言朱熹元當改
黜中總督今黜惠方殷緊急總督故可速駐蜀

中孚反覆亂政姑且不究該部知道

二十九日

兵科楊炳一本民力已竭事奉

聖旨越其杰奔潰喪師依律重擬錢士晉已有旨了

同日

右通政韓范一本遵

旨自陳事奉

聖旨韓范准致仕吏部知道

同日

刑部一本訪據事會問犯官李承恩寬宥奉

聖旨是但既擬重辟如何又引入八議法司官姑不究

四月初一日

吏部一本缺官事奉

聖旨萬國亨兄弟曾被叅劾不准推補著該部另推來用

同日

戶科沈應時一本感疾陡發事奉

聖旨准回籍調理吏部知道

同日

御史楊維垣一本會推致有辨駁事奉

聖旨會推照舊公舉取裁吏部其有不協與論者許
科道官駁停亦不得偏任意見故違阻撓該衙
門知道

初二日

吏部一本推廣言路事奉

聖旨考選限定四十名已有屢旨如何又請點五名
陳懋德等照原擬部屬用不准候補

同日

右通政彭端吾一本自陳事奉

聖旨彭端吾准致仕吏部知道

初三日

光祿寺寺丞吳良輔一本懇乞

天恩事奉

聖旨吳良輔准回籍調理吏部知道

初四日

刑部一本遵

旨嚴緝罪撫事奉

聖旨陶朗先打點私人周樹德等三人如何任其先
逃明是疎縱着該部并五城緝事衙門嚴拏務

在兇獲

初五日

北鎮撫司一本病故犯人事奉

聖旨汪文言不以病聞如何遽死以后監犯務要着實防範有病亦須醫治該衙門知道

初六日

原任戶部侍郎王德完男王一本先臣矢

忠盡瘁俯賜優卹事奉

聖旨王德完孤忠自矢照孟養浩例加祭一壇給與全葬仍以覃恩補廕一子入監讀書還與他謚

該部知道

初七日

兵科陸文獻一本國家欲求人才事奉

聖旨觀政進士着明習庶政部堂不時省試考核務期實用選法仍照舊額行不得妄有分別以啓倖竇周應秋加陞刑部尚書協理部事原無管侍郎之旨豈爲無缺汪慶百仍改科員用霍維華等補官未久尚候叙陞吏部知道

同日

原任大學士已故沈灌妻閔氏一本孤臣賁志

可憫事奉

聖旨故輔沈淮孤忠自許勲猷未竟朕甚憫惻如何
撫按不為具題待夫人閔氏自行陳乞着查例
從優議卹該部知道

初十日

太僕寺少卿潘文一本自陳事奉

聖旨潘文着留用父子同官不便公座着改大理寺
少卿照舊添柱吏部知道

十二日

刑科霍維華一本三朝慈孝事奉

聖旨本內說張差風疾逼真至如進藥移宮情形尤
朕所目睹劉一燝黨邪害正韓爌庇護元兇孫
慎行借題修怨張問達周嘉謨私改旨意朋比
為奸本當削籍念係輔弼股肱之臣姑不深究
孫慎行暨監生楊維休私刻便行彷彿撫按追
出立燬維休革去衣巾仍將此本宣付史館從
實記載其修成皇考實錄另行改正王之寀誣
陷騙官待楊連左光斗逮至追賍后一併治罪
范濟世王志道汪慶百劉廷元徐景瀛郭如楚
張捷當狂瀾既倒之時有持挺不移之節濟世

候巡撫缺用志道等六員陞太常太僕少卿添
註用唐嗣美岳駿聲曾道唯守正致排嗣美候
起服仍以左布政用駿聲二員即與推用李可
灼免成回籍冠帶閑住吏部知道

十三日

原任戶部侍郎劉曰梧一本微臣驚聞

新命事奉

聖旨劉曰梧原以端品起用既稱老疾准在籍調理
該部知道

同日

鎮撫司一本欽奉

聖諭事奉

聖旨盛世承傳淑訓俱著削了籍許念敬送法司依
律擬罪照數追贓其過付趙南星贓私著彼處
撫按嚴追完納充餉該部知道

十七日

大理寺少卿方大鎮一本奉差事完事奉

聖旨方大鎮既稱有疾准在籍調理吏部知道

十八日

工科虞廷陞一本東西有疊見事奉

聖旨樞輔已出視事戰守機宜自能了理點事責成
督撫合三省全力仍厚結土司諸路協搗以收
蕩平何士晉黨護王之案挑釁官闈增稅擾民
假公營私著革了職為民養馬當差還追奪誥
命該部知道

二十三日

禮科葉有聲一本

聖德鏡照方新事奉

聖旨本內阮大鍼起陞京堂余大成起補職方司郎
中劉一燝開說行私著削了籍為民當差仍追

奪誥命該部知道

同日

原任南道御史游鳳翔一本抱病不能赴任事奉

聖旨游鳳翔准復原官本內叅高攀龍著削了籍為民當差仍追奪誥命伊弟高如麟原係賄買文字濫中舉人先經問革遣戍姑不再究該部知道

同日

刑科蘇兆先一本天下有不得已之勢事奉

聖旨兵宜練不宜增餉宜清不宜加違本說的是王
業浩准復原官余大成劉一燦已有旨了該部
知道

同日

兵科杜三策一本病勢危苦事奉

聖旨杜三策既有疾准回籍調理吏部知道

二十四日

刑部侍郎饒伸一本微臣遵

旨事奉

聖旨饒伸著力疾供職陶朗先贓私一面行彼處無

按嚴追該部勒限追比不得寬縱

同日

御史劉弘化一本

聖治日新事奉

聖旨李騰芳相度陵工蔡毅中纂修實錄不必苛求

該部知道

二十六日

戶科郭興治一本按違罪狀久明事奉

聖旨方震孺黨庇熊廷弼失陷封疆着削了籍為民
仍着錦衣衛差的當官員扭解來京究問

二十七日

御史吳裕中一本別臺有條積習宜破事奉

聖旨蔡毅中已有旨了朱吾弼着該部議覆

二十八日

御史顧宗孟一本海宇未見清寧事奉

聖旨方孔炤着削籍為民養馬當差仍追奪誥命該部知道

二十九日

錦衣衛百戶鄭世英一本計期伊過事奉

聖旨周朝瑞着錦衣衛北鎮撫司監候待楊漣等奉

五一併究問

同日

御史王時英一本京卿壅滯事奉

聖旨程註身據要地植黨行私著削了籍為民養馬
當差仍追奪誥命該部知道

同日

錦衣衛田爾耕接出

聖諭朕惟古來好義之風恒自巨室倡之其有誼篤
休戚而捐重資以佐縣官可無褒錫以昭激勸
邇自逆酋匪茹墨吏不戒索賦轉餉數年于茲

朕方特命撫臣修舉屯政以濟軍需爾耕乃慨
捐田土七千餘畝心激同仇耻以賊遺君父志
存滅虜不遑更問室家彼擁阡陌而忘國恤者
當自汗顏若借軍興以飽私橐者能無褫魄有
臣如此良用嘉嘆特賜壘書褒美仍命所司賚
之羊酒特為建坊以示朕眷知至意於戲損私
益公臣子忠君之義賞一勸百朝廷勵世之權
欽哉故諭

三十日

戶科郭興治一本微臣未盡事奉

聖旨當四路失事陳王廷差滿交代猶不敢擅離地方准復原官用其監軍御史應否當發看該部院酌議具覆

五月初一日

御史陳以瑞一本詞臣久玷清議事奉

聖旨錢謙益向以潛通關節賄賣舉人致于糾劾却又倚傍邪黨把持朝政俸職今官沈正宗與援鑽求察處復用都着削了籍為民當差仍追奪誥命該部知道

初二日

御史梁炳一本中外安攘相須事奉

聖旨這本話多樵拾更見迂腐該部知道

同日

御史李應公一本鎖鑰之寄匪輕事奉

聖旨這本說王洽掌選撫浙既叢物議着回籍冠帶
閑住宋槃策勵供職該部知道

同日

戶科張士升一本館選欲求真才事奉

聖旨考館嚴筴已有旨了蔡毅中准致仕該部知道

同日

刑科霍維華一本

明旨輕重當酌事奉

聖旨張我續何士晉趙彥已有旨了方震孺黨邪宜
淫官歲大壞致失封疆姜升係內臣熟審諸臣
自有法律霍維華偏護市恩姑不究該部知道

同日

兵部尚書趙彥一本臣病愈甚性命堪憂事奉
聖旨卿定亂功高筦樞猷茂倚任方新求退愈懇准
回籍調理還着馳驛去該部知道

同日

錦衣衛一本患病不能供職事奉

聖旨趙昌胤准回籍調理該部知道

同日

江西巡撫韓光祐一本

天恩隆重事奉

聖旨韓光祐准致仕吏部知道

同日

大理寺少卿韋蕃一本遵

旨自陳事奉

聖旨韋蕃准回籍調理吏部知道

同日

御史趙胤昌一本

聖明御宇事奉

聖旨世道維新封疆多故簡賢圖治選將練兵樞輔
冢卿督撫自有方畧翁正春纂修大臣不必輕
詆霍守典着回籍聽勘該部知道

同日

御史鮑奇謨一本練兵等事奉

聖旨這本條議練兵安民亦中窳縻翟鳳冲元無大
罪狀着策勵供職該部知道

初三日

原任刑部郎中岳駿聲一本直陳閹宦舊案事
奉

聖旨張差風顛情節原招甚明王之來故捏虛詞口
授逼供離間宮闈誣陷身命罪已滔天却又嚇
詐鄭國泰銀兩至于三萬遂其子鄭養性踉蹌
去國漂泊無居似此貪婪奸狠即肆諸市朝亦
豈為過姑免深究着該撫按追完前贓解部充
餉仍將此本宣付史館詳載顛末播告天下岳
駿聲即與起用本內有名的官員該部查無別

項情由止因此事沉滯者酌量叙陞其鄭養性
准回京師九門外安插管業該部知道

初四日

御史袁鯨一本大僚不可拙藏速化事奉

聖旨翁正春已有旨了宋桀屢經指摘着致仕回籍
劉憲寵革任閑住以后坐船有裝載客貨的該
地方查明入官充餉本官一體治罪該衙門知
道

初五日

大理寺卿曹珍一本病中思母事奉

聖旨曹珍念母情殷准暫假歸省還依限前來供職
該部知道

同日

尚寶司少卿陳以聞一本風病陡發事奉

聖旨陳以聞既已下部只宜靜聽處分不得自行瀆
奏該部知道

同日

錦衣衛百戶葉世清一本計期漸迫事奉

聖旨袁化中着錦衣衛北鎮撫司監候待楊連等拏
到一併究問

同日

御史魯應瑞一本邪臣賣國事奉

聖旨趙彥已有旨了本內說張我續通夷盜餉所關
重大豈可懸坐還俟查明議處該部知道

同日

尚寶司少卿曠鳴鸞一本風疾事奉

旨曠鳴鸞既已下部只宜靜聽處分不得自行瀆
奏該部知道

初六日

御史門克新一本世道當澄清之會事奉

聖旨這本說的是朝政維新當防伏莽戰守未預速
計綢繆至于熊廷弼欺君悞國罪在不赦仍俟
秋后正法葉燦朋比黨類錢春仇正黨邪張光
縉兄弟濟惡都着削了職為民當差該部知道
初八日

御史盧承欽一本仕路已見清明事奉

聖旨府州縣監司陞轉差覲履任稽遲着該撫按叅
處賜環諸臣起陞不同奉有特旨不必槩求速
化部寺司官壅滯已極委宜疏通今后姑准考
選部員暨新進士除授俱添註其外官應陞外

的遇缺即推應陞內的不妨久任候正缺出方
許推陞孫居相不必深究徐夢麟着冠帶閑住
該部知道

初十日

禮部尚書翁正春一本百齡慈母事奉

聖旨卿母年高准回籍歸省念係皇祖講官功著啓
沃加陞太子少保照新銜給與應得誥命還着
馳驛去該部知道

同日

太僕寺少卿陳九疇一本臣質樸陋事奉

聖旨人臣能自樹立何論科甲陳九疇簡任方新着
照舊供職不准辭該部知道

十一日

工科王夢尹一本仕路雖漸清明事奉

聖旨翁正春已有旨了區大倫恬節清品精力未衰
奉旨轉南何必苛求該衙門知道

同日

御史石三畏一本奸臣黨邪欺君事奉

聖旨劉弘化貪橫黨奸着革了職為民吳炯失身獻
媚着冠帶閑住該部知道

同日

吏科黃承吳一本求丁用人最急事奉

聖旨這本說的是姚祚端無端倒轉郎存性良吏被
陷俱准復原官惠承芳荆養喬俱著開住該部
知道

同日

禮科盧時泰一本驚聞母病事奉

聖旨盧時泰念母情殷准給假歸省該部知道

十四日

南贛巡撫李成名一本恭謝

天恩事奉

聖旨御名既係候犯姑免降調准以原官回籍吏部知道

同日

川湖督餉丘兆麟一本救隣不忘披纓事奉

聖旨何士晉貪污著聞駐私狼藉削奪未盡其辜丘兆麟反覆稱揚不啻口出耳目之臣聞見豈宜如此姑不究其督餉事宜著歸併沅撫臣補勅與他

十五日

刑科潘士聞一本封疆之係甚重事奉

聖旨債帥既以夤緣希進復以真援保全樞政一新
覆轍當鑒宜着實振飭以杜倖竇茅元儀未有
功効豈堪大用徐縉芳已經赦條不必行查該
部知道

同日

刑部侍郎饒伸一本微臣萬分當去事奉

聖旨饒伸念母情深准回籍侍養該部知道

十六日

御史周維持一本貪官穢迹久彰事奉

聖旨趙彥平妖有功難以盡掩其子昌胤受賄著聞
劉惟忠兇險黨惡俱著革職白所知清謹已有
旨了張問達怙引王之寀結黨煽惑姑著冠帶
閑住周嘉謨倚比王安茂旨用上著削了籍為
民當差仍追奪誥命該部知道

同日

刑科霍維華一本正氣方伸事奉

聖旨韓敬風係湯賓尹門生簾內隔房搜取乂干物
議已經察處霍維華突出薦甄殊駭聽聞姑不
究該衙門知道

十七日

刑科杜齊芳一本啟陳仕路宜微事奉

聖旨陳幼學賈濫清卿著令致仕重卷情獎委宜嚴
行查核該部知道

同日

原任太常寺卿王遠宜男王之珙一本勞臣奉
自身殞事奉

聖旨王遠宜卹典著該部即與照例題覆其門工著
勞待后并叙

二十日

原任都察院司務李桂芳一本素守官箴事奉
聖旨李桂芳被展于三轉之后顯是奸黨朋謀陷害
准復原官該部即與推用

同日

禮科楊所脩一本直糾悞事官員事糾胡世賞
奉

聖旨已有旨了該部知道

二十二日

御史汪裕一本京卿清要事奉

聖旨甄淑附勢反覆驟躡清卿著削職為民張光房

扶身門戶胃溢京秩著冠帶閑住該部知道

同日

戶科陳序一本

聖德動天事奉

聖旨王圖既久病不行到任准以原官閑住甄淑已
有旨處分了胡世賞耳中誤聽不必深求該部
知道

二十三日

戶科楊文岳一本致治當提其源事奉

聖旨這本說的是文選職方之弊至今極矣今後遇

缺堂上官選宜選擇廉明司屬破格超補務要
竣事方許推陞撫按于地方文武官員試其才
品更加意體訪得真方許登薦其才品異等的
不時咨部以需急擢段然貪橫黨邪公論久棄
着革了職為民當差蕭雲舉係大臣既無大過
不必深求該部知道

二十四日

工部尚書白所知一本久病難痊事奉

聖旨卿清勤涖事大工倚賴乃連章請告情詞迫切
准回籍調理仍着馳驛去該部知道

二十五日

吏部一本擬補去留宜重事復御史莊謨參尚
寶司少卿廣鳴鶴陳以聞俱降三級調外任奉
聖旨是

同日

御史智鋌一本奸貪尚多漏網事奉

聖旨徐光啓招練無功准冠帶閑住馮時來賍私狼
籍削去官職熊廷弼犯囚何得逍遙因圍布散
刻揭其往來閑通人等便着緝事衙門拿究問
提牢官所司何事玩法故縱姑不究以後但有

一人潛入監禁偵探消息該管官吏俱行問革
該部知道

二十八日

原任宣府巡撫王之臣一本縣才不堪任重事
奉

聖旨奪情起用往例具在王之臣素有才望豈得以
曾經彈射故為遲阻著即到任供職不允所辭
該部知道

二十九日

禮部尚書蕭雲舉一本衰齡漸迫事奉

聖旨卿望隆端品勞著纂修何乃連章求去情詞懇切准回籍調理念係兩朝講官加陞太子太保照新銜給與誥命仍著馳驛去該部知道

六月初一日

御史汪若極一本亟禱邪穢之臣事奉

聖旨李標與趙南星雖係門牆絕無點染何得妄議翟鳳冲屢被人言着削了職回籍聽勘該部知道

初二日

御史陳睿謨一本奏運方隆事奉

聖旨人臣一意奉公凡事節省其于財用宜但能生
亦且膏裕今後內外各衙門務須一體奉行本
內周延光蔡夢麟著該部分別議處

同日

廣東巡按胡良機一本進繳

勅諭事奉

聖旨胡良機既陞叅議如何不候交代擅離地方藐
視國法着削了職為民當差仍追奪誥命該部
知道

同日

御史卓邁一本仕路患在積新事奉

聖旨孟習孔貪橫黨邪趙從昏闇竊奸有玷京卿都
着冠帶閑住該部知道

同日

直隸巡按宋師襄一本薦舉地方人材事奉

聖旨盛以弘進講不清鑽謀入閣奉有明旨宋師襄
以鄉曲之情徇私濫薦本當重處姑降一級調
外任用該部知道

初四日

原任戶部尚書李長庚一本庸劣不堪事奉

聖旨李長庚以才望推陞既稱病請告准在籍調理
餉務重大著即推在京有心計的來用吏部知
道

同日

南京太僕寺少卿濮中玉一本遵

旨自陳事奉

聖旨濮中玉准致仕吏部知道

同日

御史高弘圖一本國是既明事奉

聖旨近來朝政稍清皆緣邪黨漸退詔獄繫逮尚未

審明何得便付法司堯舜之世省生四凶皋陶
五刑將何所用高弘圖好生愚昧不達政體內
沈演仍候府尹缺用李自蕃准以運同調用王
雅量着以原官起用該部知道

初五日

兵部侍郎張鳳翔一本風疾增劇事奉

聖旨張鳳翔請告情詞真懇准回籍調理該部知道
同日

御史陳世竣一本館選當計其終事奉

聖旨纂修需人公鴈不必苛求麻僖既是邪黨着革

任聽勘周希聖清慎素著豈得以風聞求去庶
吉士散館科道部屬通用吏部知道

同日

御史余文燭一本植黨有源事奉

聖旨汪文言托左光斗鑽求何得輕詆去輔陳一元
既經察處驟躐清華着革任回籍陳長祚不必
追論該部知道

同日

御史田景新一本次輔陰邪事奉

聖旨次輔夙以才望簡任綸扉勤勞可嘉方切倚毗

田景新不諳事體輒以風影見疑好生多事念
係言官姑且不究張鳳翔已有旨了該部知道
同日

屯田董應舉一本鼓鑄急需等事奉

聖旨鼓鑄資本既商人樂輸公私俱便鑄局着到荆
月議建銅鉛一併嚴禁魏良佐准加僉事職銜
葛寅亮酌量加銜委任如議董應舉勅書中着
兼戶部銜以便行事其事宜瑣屑者聽便宜行
不必奏請務殫心力有裨財用該部知道

初六日

御史陳朝輔一本樞臣受事方新事奉

聖旨張鳳翔當羣兇氣焰不能早自振拔甘縱比附
武邑之后半屬黔省賊擒兵剋何得有功乃樞
篆甫署輒推匪人還着削職為民當差追奪誥
命并削子廕該部知道

初十日

禮部侍郎李標一本臣病日深事奉

聖旨李標心迹已明何乃連疏請告情詞迫切准回
籍調理病痊起用該部知道

十一日

廣西道御史梁炳一本直糾貪競邪臣等事奉
聖旨董其昌以夙望簡擢南鄉履任未幾何得輕詆
孫善繼李騰蛟着該部看議來說

同日

工科楊所修一本大奸未去事奉

聖旨是姚希孟險心毒手仇正黨邪着革了職為民
當差仍追奪誥命游漢龍昏庸貪老姑准冠帶
閑住該部知道

同日

刑科潘士聞一本奸邪門戶既破事奉

聖旨李喬嵩陳必謙張國紳朋比為奸黨邪害正都
着削了籍為民當差李喬嵩仍追奪誥命該部
知道

同日

太僕寺少卿金士衡一本微臣風疾難痊事奉
聖旨金士衡准回籍調理病痊起用吏部知道

同日

御史倪文煥一本直糾貪橫監司事奉

聖旨王維寧貪橫異常草菅民命着削了籍為民當
差以後撫按官嚴諭監司府州縣不許濫受民

詞越疆勾攝以滋民害該部知道

同日

應天府府丞陳一元一本遵

旨自陳事奉

聖旨陳一元已有旨該部知道

十二日

御史李喬嵩一本貪險科臣挾私妄噬事奉

聖旨李喬嵩強辯飾非反噬無據好生恣肆已有旨
削奪姑不究該部知道

同日

大學士朱延禧一本臣心已蒙

聖鑒事奉

聖旨卿忠勤輔政倚任方殷乃連章控陳情詞懇切
難以強留著馳驛歸里該部知道

同日

御史曾應瑞一本操軍違律生變事奉

聖旨岳元聲素以媚邪驟躋樞貳却又養癰貽患卸
罪居功姑准回籍聽勘王永光著馬上差人催
其到任料理該部知道

同日

刑部一本遵

旨回話事奉

聖旨游士任係冒犯冒破有人總是罪案僅擬納贖
革職何以服天下後世還着照律例詳擬來看

十三日

御史顧宗孟一本留樞具疏內有隱情事奉

聖旨岳元聲已有旨了該部知道

同日

南京太常寺卿杜士全一本遵

旨自陳事奉

聖旨杜士全留着用吏部知道

十四日

御史王際達一本元兇未去事奉

聖旨畢茂康依附邪黨賣綠撫臣妄報軍情職守安
在李騰芳被察復起躐躋佐銓聞議加銜出自
何典都著削了職為民當差仍追奪誥命該部
知道

同日

吏部一本缺官事奉

聖旨畢茂良督餉部院另推來用不准推

同日

吏部周如磐一本微臣庸劣事奉

聖旨卿以才望簡畀宮端着遵旨到任供職不准辭
該部知道

同日

南京都察院一本遵復舊規事題御史黃公輔
革職為民將張繼孟巡視下江奉

聖旨是

十五日

錦衣衛一本計期伊遇事奉

聖旨左光斗着錦衣衛帶送鎮撫司監候待楊漣等
拏到一併究問

同日

吏科吳弘業一本滇藩危在旦夕事奉

聖旨是縣事危急閑洪學着以今新銜仍舊巡撫其
兵部右侍郎員缺另推來用該部知道

同日

吏部一本缺官事奉

聖旨沈演起順天府府尹

十六日

刑科潘士聞一本邪臣反噬事奉

聖旨潘士聞清勤著聞朝紳共信豈潑口所能噬護
這所奏知道了着照舊供職

同日

錦衣衛百戶黃嘗一本計期伊通事奉

聖旨魏大中着錦衣衛拏送北鎮撫司監候待楊燁
拏到一併究問

十七日

司禮太監韓世祿一本貪臣忤法事奉

聖旨貪官害民屢旨申飭柰何幾輔近地敢有目前

無知知縣唐紹堯者世駐原係職官家產皆其
世業乃未犯大逆責過迫逃挾詐不遂擅行抄
沒巨萬家資悉充囊橐僅餘銀捏作充餉希圖
抵飾清明世宙豈容有此白晝之魍魎哉看錦
衣衛差的當官旗將知縣唐紹堯及衙役張聚
所王蘭并本內有名人犯俱扭解來京究問該
衙門知道

同日

吏科黃承昊一本先臣夙寃未明事奉

聖旨王衡雖輔臣子夙稱才雋屢占高科鄉試被叅

兩覆益粹乃主考黃洪憲久錮即世抱冤可矜
一切卹典著該部即與查覆

同日

御史何可及一本直糾邪靡撫臣事奉

聖旨畢茂康已有旨了該部知道

十八日

大理寺左寺丞劉思誨一本充餉原經題請事
奉

聖旨劉思誨曲徇貪官朦朧批解胡永順與唐紹堯
實係同鄉強詞飾辯俱該重處姑從輕都著降

三級調外任用該部知道

二十一日

御史陳以瑞一本雄奸巧踞清班事奉

聖旨劉懋着該部看議來說

二十三日

御史劉弘光一本直糾邪黨事奉

聖旨王圖程正已趙昌運彭遵古潦倒門戶邪黨著
聞都着削了籍為民當差仍追奪誥命該部知
道

同日

九門提督太監金良輔一本違旨逞兇事奉
聖旨倪文煥違制擅責官軍又縱班皂不時需索法
紀何在着回將話來本內有名楊大道楊逢春
史臣學李式并史長班衙役番皂人等俱着錦
衣衛拏送鎮撫司究問

同日

刑部訪據事奉

聖旨張國柱招集李鵬等黑夜搶刦窩盜情真豈得
以軍職廢法着該部行提到官俱從重擬罪王
三吾挾詐鄭養性資財數多并着嚴拏追究以

彰法紀

同日

原任御史田一中一本直陳微罪事奉

聖旨是這所奏事情便着宣付史館從實紀載朱光祚夙與胡忻朋比納賄居官全事粉飾畧無實政着削了籍田一中素直亮淹滯已久該部即擬堪陞京堂推用

二十五日

吏部尚書崔景榮一本病勢甚危事奉

聖旨卿偶病准給假調理數日痊可即出視事大選

日期既經奏請暫委李宗延代攝掣籤該部院知道

二十八日

錦衣衛一本計期伊邇事奉

聖旨楊漣既擎到着錦衣衛擎送北鎮撫司看實打
着問前招七次贓私下落具奏

二十九日

原任太僕寺少卿陸彥章一本病臣陡蒙異數
事奉

聖旨陸彥章恬節素著准以新銜致仕吏部知道

同日

工科王夢尹一本都會藏奸之數事奉

聖旨倪文煥聽信群下非分用刑已置寬政如何又
來瀆擾巡緝各役未見具奏從何處釋王夢尹
委行窺探本當重處姑不究

同日

倉場總督畢茂良一本風疾事奉

聖旨畢茂良勤慎著聞既稱有病回籍調理該部知
道

三十日

御史周維持一本直糾貪穢事奉

聖旨近來銓司向多邪黨盤據故推陞選法有堂官
照顧不到廩餼生弊端以後選擇文選務要清
楚不必循資劉行義賍私狼籍着革去冠帶聽
勘王任杰准閑任吏部知道

同日

御史余文燭一本盜臣踪跡詭秘事奉

聖旨郭自維等着該城御史提問追究買官行賄緣
由具奏條陳銓法該部酌議舉行

七月初一日

錦衣衛一本玩法誑君事奉

聖旨唐紹堯并衛役人等既挈到着錦衣衛送北鎮撫司究問追贓具奏

同日

鎮撫司一本計勘伊邇事奉

聖旨楊漣既已服辜着不時嚴刑追比五日一回奏待追贓完日送刑部據招擬罪

同照

原任禮部右侍郎張邦紀一本風疾未痊事奉聖旨張邦紀壯年多病准在籍調理病痊地方官奏

薦起用該部知道

初三日

御史莊謙一本仕途雖漸肅清事奉

聖旨胡應台附比奸邪游蹤華騰著革任回籍

初四日

御史劉弘光一本糾儀事奉

聖旨李思恭既有疾著致仕失儀姑不究該部知道

同日

錦衣衛千戶孫弘道一本按遼罪狀事奉

聖旨方震孺身任監軍望風奔竄失陷封疆與熊廷

弼同罪且門役女飾靡費金錢羸負參貂押送
歸里巡方體面掃地無餘着送刑部嚴究追贓
從重擬罪以為憲臣失職之戒該部院知道

初七日

北鎮撫司一本詔獄業已具聞事奉

聖旨楊漣等黨比熊廷弼淪沒封疆且納賄招權擾
亂朝政移官一事陷朕不孝罪惡滔天許顯純
如何擅求送刑部明屬徇私姑且不究還着本
司照原叅數目嚴比追贓限五日一回奏不得
寬縱

同日

又一本貪官忤法事奉

聖旨唐紹堯并衙役各犯俱送刑部追贓從重擬罪
其郭應奎等無干姑免究

初八日

北鎮撫司一本遵

旨回奏事奏追比楊漣并交過贓銀數目奉
聖旨知道了

初十日

尚寶司司丞孫善繼一本衰病侵尋等事奉

聖旨吏部知道

同日

禮科葉有聲一本封疆不應再悞事奉

聖旨兩鎮兵馬應照原分信地各為防中張繼善取
之東鎮張拔取之登鎮該撫疏議甚明不必爭
執王國禎身膺佐樞久不到任豈臣子急公之
義并着申飭行兵部知道

同日

聖旨傳與刑部犯人陶朗先游士任方震孺唐紹堯
等既在禁中當穿囚服乃縱容他角巾色衣盃

酒笑傲成何法紀着提牢主事回將話來

十二日

北鎮撫司一本遵

旨回話事奉

聖旨楊漣等數萬贓私零星交納完局何期許顯純
姑不究以後着嚴比追完不得仍前踈縱以取
罪戾

十六日

北鎮撫司一本遵

旨回奏事第三次五日追比各犯等贓私數目奉

聖旨楊鏈等贓私追不及數顯是賣法許顯純崔應元各降一級着照舊追比仍限五日一回奏如再寬縱重治不饒

十七日

直隸巡按劉大受一本民運不至月糧缺乏十分窘迫事奉

聖旨本內夾空紙一幅劉大受大不敬本當重處姑罰俸一年該部知道

十九日

大學士顧秉謙一本直陳第一要務事奉

聖旨覽卿等所奏具見忠誠為國朕悉鑒知見今東
西未靖安攘無策正賴卿等協力勛勦所請校
卜閣員吏部公同九卿科道會推將見任并在
籍素有才望老成幹濟的推五六員來俟朕簡
用吏部知道

同日

吏科魏照乘一本微臣至情真病事奉

聖旨魏照乘准回籍調理病痊起用吏部知道

同日

御史倪文煥一本東林渠魁尚伏事奉

聖旨李邦華東林高足向與李三才結為死黨同姪
李日宣狡計陰謀傾害善類周順昌竊附東林
營入吏部貪橫異常仇逐朱童蒙不安其位厚
結汪文言呼吸相通又與魏大中構黨同盟逮
過姑蘇留連十日以女許配婚目中尚知國法
林枝喬改調署選惟賄是聞縱子林堯世私藏
庵觀收銀賣官鑿鑿有據都着削了籍為民當
差仍追奪誥命內有賍私狼籍者還着撫按提
問追賍充餉其私創書院扁額雖去碑記猶存
着禮部即行毀碎回奏以為植徒聚黨之戒該

部院知道

二十日

吏部尚書崔景榮一本沉痾難痊事奉

聖旨統均清慎倚任方殷何乃連章請告情詞懇切
准回籍調理病痊起用着馳驛去該部知道

同日

御史刑紹德一本糾儀事奉

聖旨曹維信營謀解銀希圖冒破又見朝不到事屬
違錯大不敬着削了職為民該部知道

同日

原任御史康丕揚一本

聖政俱新事奉

聖旨康丕揚向為沈一貫鷹犬邪媚貪酷數掛彈章
已經察處今又借端具疏希圖起用着九卿科
道從公會議叅看的確具奏

同日

工部主事趙天賜一本進繳勅諭事奉

聖旨勅諭准進繳趙天賜被察不謹應否復原職着
吏部查議具覆

同日

鎮撫司一本遵

旨回話事奉

聖旨楊漣等贓私數多零星交納何日得完還着嚴
加追比不得徇情寬縱

二十三日

都察院一本乞恩代題事奉

聖旨李玄准回籍調理病痊赴部候題該部知道
二十五日

御史袁鯨一本黔疆平蕩無期事奉

聖旨韓策為趙南星手引以外藩而巧列上卿汪先

岸與汪文言同宗合契而盡坑其餘賄都着削
了職為民當差仍追奪誥命本內屯運官解納
米分鑄等事該部酌議具覆

同日

刑科杜齊芳一本文謨宜振事奉

聖旨董其昌已有旨了王三善剛愎自用止許楊述
中督餉見于屢疏自明比至大方久任宣淫卒
致師潰與述中何干杜齊芳偏護同鄉姑不究

二部知道

鎮撫司一本病故犯人事奉

聖旨楊漣左光斗病故着法司委官相視明白屍親
領埋還行彼處撫按嚴提家屬追贓回奏該部
知道

二十八日

兵科李魯生一本慎枚卜重政本以佐

聖治事奉

聖旨這本說的是枚卜重典國體攸關如去輔韓爌
三年揆席半籌莫展有與侯爵納賄行私妬正
比邪大負委任着削了籍為民此番懲前毖后

務要博訪輿論從公推舉必得真品真才以濟
時艱不必盡拘資序該部知道

同日

御史石三畏一本提邪正之大關事奉

聖旨本內叅邪黨李三才顧憲成曹于汴等諸臣已
故的着追奪誥命見存着削籍為民當差仍追
奪誥命其守正被屈者酌量擢用該部知道

同日

鎮撫司一本遵

晉回奏事題左光斗交銀四十三兩六錢表化中交

銀一千二百二十四兩五錢魏大中交銀五百
五十兩周朝瑞交銀一千五百十七兩四錢顧
大章交銀八百零三兩三錢奉

聖旨知道了

二十九日

鎮撫司一本病故犯人事奉

聖旨魏大中病故着法司委官相視明白屍親領埋
還行彼處撫按嚴提家屬追贓回奏該部知道
八月初一日

戶科薛國觀一本遵奉

聖旨回奏事奉

聖旨吳士弘李壯圖倚張鳳翔親暱營私咨用又恣
意剋軍肥已着該撫按提問追贓具奏兵部知
道

初二日

北鎮撫司一本遵

旨回奏事奉

聖旨袁化中等駐私尚多還着嚴追逮完仍限五日
一回奏不得徇情寬縱

初三日

都察院一本母病子病事題御史余文燿患病
奉

聖旨是

初四日

御史安伸一本欣逢

聖治維新事奉

聖旨馬世龍已准策勵不必苛求關門不許收降已
收者酌量散處不許圍聚生奸當今民窮財盡
又值旱潦相尋責在撫按督率有司及時安撫
貪濁成風久而難變內外群工亟圖砥礪朕亦

樂與維新徐縉芳表世振贍私數多如何尚未
結局着該撫按嚴追助工李朴于玉立何功何
節死猶濫贈卽與追奪邵輔忠首發巨奸田生
金朋比匪人應何陞斥吏部速議來看

初七日

御史張訥一本書院已改祠忠事奉

聖旨這都城書院改作忠臣祠久已有旨會議如何
至今尚未具覆其東林關中江右徽州一切書
院俱着拆毀暨田土房屋估價變賣催解助工
本內有名如鄒元標少負忠名出山潦倒其身

雖已久故然巨奸依勢之惡尚存着削了籍仍
追奪誥命外如孫慎行馮從吾余茂衡名雖假
于理學行無異于市井或通關節而居之不疑
或躬窩主而覲顏無耻甚至假仙惑世吞產謀
孤讀之至此令人指髮此三員都着削了籍為
民仍追奪誥命鄭三俊畢懋良附鱸逐穢合詞
同疏姑准冠帶閑住河東巡鹽御史既例不入
陝獨以會講而入糜費公私俟回道時都察院
考核示懲該部知道

初九日

鎮撫司一本緝獲事奉

聖旨熊廷弼失陷封疆難逃三尺蔣應陽心兇膽大
乃與其子出入監禁隱謀叵測即其授受妖書
演習弓馬不軌之迹顯然着刑部從重擬罪魏
忠賢發奸摘伏懋建奇功原庶弟姪加陞二級
仍賜勅獎勵以示優異還賞銀三十兩絲段二
表裏羊二隻酒三十瓶新劍三千貫其原辦官
旂照例併叙該部知道

同日

吏科黃承昊一本溫恩宜再事奉

聖旨人臣有巨奸顯惡罪在不宥者方行削奪豈有予奪相半之理這本市恩要名姑不究該部知道

初十日

吏部一本缺官事奉

聖旨李養正見追陶朗先等贓銀未結左都御史着另推來用

十一日

吏部等衙門會推閣臣

周如盤 丁紹軾 薛三省 黃立極

彭凌霄 林堯俞 錢龍錫 駱從宇

馮銓 李宗延

十二日

吏部一本缺官事奉

聖旨周如盤以原官兼東閣大學士丁紹斌黃立極
各陞禮部尚書兼東閣大學士馮銓陞禮部右
侍郎兼東閣大學士俱同首輔顧秉謙等入閣
辦事

同日

工部侍郎董可威一本遵例捐俸事奉

聖旨捐俸助工具見急公該部知道

同日

諭內閣

聖諭朕自去歲以來屏逐兇邪廓清朝宇勵精圖治
雅意中興念國步之維艱憫生民之日促宵衣
旰食焦心勞思而秉軸大臣莫肯為朕分猷共
念者且軍興告匱斟酌何方疆場未寧安攘何
策即如楊漣左光斗等移宮一事背

先帝之深恩陷朕躬于不孝又能延弔葬喪遼辱國一
案便寸斬尚有餘辜而楊漣左光斗等各納其

重賄巧求出脫此皆天地之所不容人臣之所
切齒即五刑不足以申其法九死不足以盡其
愆肆諸市朝用彰憲典而在朝大臣持操養交
徇私避禍但顧子孫之計不圖社稷之安朕方
率循舊章而曰朝政日亂朕方祖述堯舜而曰
大不相侔以致言路各官承望風旨緘口結舌
無敢直明其罪者國家養士竟何賴焉卿等可
傳示大小官員自今以後務要改過自新共
維國是掃清門戶專力封疆再敢有陰懷觀望
暗弄機關或巧借題目代人報仇或捏寫飛言

希圖翻案者朕按祖宗所立紅牌俱治以說謊
欺君之罪必不食言其楊漣等三人生為貪婪
之賊臣死為不忠之逆鬼今雖在獄身故而殘害
忠良同惡之類尚存俟追贓完日明具爰書暴
其罪狀布告遠邇昭著史冊垂示將來以為萬
世人臣不忠者之戒特諭

十三日

戶科楊文岳一本海外獻俘等事奉

聖旨獻俘真偽委當嚴查兵部知道

同日

大學士顧秉謙等一本本月十二日臣等恭侍
經筵親承

皇上面諭楊漣等罪惡多端今雖在獄身死其未完
贓私行彼撫按立限追比理合回奏奉

聖旨覽卿等奏朕知道了該部院知道

十八日

御史李先春一本直發門戶巨奸事奉

聖旨葉向高三朝元輔既已歸田不必苛求張我續
方行撫按查勘黃正賓已經提問追贓徐一泰
着酌議具覆吏部知道

同日

刑部一本貪官忤法事奏審過高陽知縣唐紹堯充軍快手張聚所等擺站奉

聖旨是

二十一日

吏部一本遐荒利病宜核事覆河東運使顧懋光不謹副使鄒嘉生降級奉

聖旨是

同日

北鎮撫司一本病故犯人事奉

聖旨袁化中賍完病故着刑部委官相視明白責令
親人領埋

二十三日

大學士魏廣微一本犬馬餘生望懇事奉

聖旨卿忠勤輔政倚任方殷乃連章請告情詞迫切
難以強留着加少傅兼太子太師廕一子與做
中書舍人仍遣行人護送馳驛歸里加賜銀一
伯兩綵段四表裏大紅紵絲坐蟒一襲稱朕優
禮至意卿還善自調攝以需召用該部知道

同日

禮部尚書林堯俞一本報主有心延生無術亡
奉

聖旨卿興禮勤勞方切倚任乃請告情詞愈迫准回
籍調理着馳驛去該部知道

同日

南京太僕寺少卿汪先岸一本捐微俸事奉

聖旨汪先岸削奪已久何俸可捐又來竢聒姑不究
該部知道

二十四日

吏部一本恭復欽命事奉

聖旨是議譙益准復原官造車著勞仍與優叙

同日

吏部一本奉運方隆隱形迭見事光祿寺卿周
延光降一級奉

聖旨是

二十五日

御史蔡國用一本目擊時艱等事奉

聖旨輔臣以救時為第一義朝政雖已清明還須破
格調停而止本源逆節未殲樞輔久駐關門責
令各督撫官盡心體訪有智勇無全者咨薦兵

部以備不時之用鼓鑄期于便民鐵券豈可通行邵輔忠等已有旨起用元詩教諸臣着該部酌議具覆八月不必考選着遵旨行邊吏果能稱職止當加銜久任若不時行取反啓僥倖之心該部知道

同日

諭內閣

聖諭朕踐祚以來日夕兢兢思復祖宗封建疆奉行祖宗法度與二三大臣及諸百執事三令五申至諄切矣自逆奴犯順遼左戒嚴我

皇祖特起熊廷弼于田間授以經畧賜之尚方賜之
蟒玉寵極人臣義當盡瘁乃廷弼欺朕即位之
初始則托病卸肩薦袁應泰而遼陽亡既則剛
愎不仁望風先逃而河西失當是之時不知費
國家幾百萬金錢喪軍民幾百萬性命而征兵
西蜀則西蜀變風聞山東則山東亂至今黔中
尚岌岌未寧斯其罪難擢髮數矣迨三尺莫追
復百計鑽求其最甚者則有周朝瑞十日四疏
以救有顧大章妄謂罪屬可矜而又托奸徒汪
文言內探消息外八楊漣左光斗魏大中袁化

中之幕囑令遺書求解諸奸受賄動以萬計
又安問

祖宗疆土與

祖宗法度哉朕深切痛恨已將楊漣等置之于法頃
八月二十一日于文華殿日講畢卿等五員獻
刊行有像遼東傳一冊出諸臣袖中合詞奏曰
此熊廷弼所作掩飾誇功希圖脫罪朕親覽之
豎髮切齒此蓋熊廷弼奸謀不得肆行于朝今
又敢以流言煽惑于野且心懷不軌辱國喪師
惡貫滿盈罪在不赦而又刊書惑衆情益難容

况屢經言官郭興治門克新石三畏周洪謨等
形于章疏再四評彈宜亟加兩觀之誅庶大快
萬民之憤卿等既擬諭來具見獻書忠懇至意
朕甚嘉焉卿等即傳示刑部等衙門着便會官
速決了以為人臣辱國偷生罔上不忠者之戒
特諭

二十七日

刑部一本傳奉事奉

坐首熊廷弼罪惡貫盈既已正法還着傳首九邊示
衆仍追奪誥命家屬人等着緝事衙門及五城

兵馬即時驅逐出境不許潛住京師如有跡
一併嚴究不饒

同日

北鎮撫司一本遵

回奏事奉

旨顧大章仍着嚴比追贓不得寬縱

同日

原任大理寺寺丞李凌雲一本風疾轉劇事奉
聖旨李凌雲准在籍調理病痊起用吏部知道

同日

御史李嵩一本小人之術漸窮事奉

聖旨朱一桂李養質暑量加陞擢用元詩教年志變
并前本趙興邦俱以原官起用吏部知道

九月初一日

吏部一本欣逢

聖治事奉

聖旨田生金屢疏陳瀆准冠帶閑住

初二日

北鎮撫司一本病故犯人事奉

聖旨周朝瑞脏完病故着刑部委官相視責令親人

領埋該衙門知道

初三日

北鎮撫司一本緝獲事奉

聖旨犯人侯權等着送刑部依律從重擬罪魏忠賢
釐奸剔弊累著奇功原應第姪加陞二級仍賜
敕獎勵以示優異還賞銀三十兩絲段二表裡
羊二隻酒三十瓶新鈔三十貫其原辦官旗照
例併叙該部知道

同日

又一本回奏事奉

聖旨顧大章贓銀還着嚴比追完毋得寬縱

初七日

御史賈繼春一本逆臣身已服辜事奉

聖旨先帝升遐朕躬嗣服父子承繼正統相傳臣子
何得居功而楊漣左光斗等妄希定策串通王
安倡為移宮之事捏造垂簾等語王安奸惡異
常乘機報怨内外交結黨衆力强不許康妃從
容奉旨而逼令踉蹌出宮先帝體尚未寒言猶
在耳漣等即有權勢固亦人臣乃棄禮忘君犯
上不道至于此極使非賈繼春等誣搗明斥于

前天牖朕心憬悟補封于后將始終蒙蔽恩禮
有虧而朕于

皇考不得為純孝即寸斬楊漣左光斗何救于事况
與魏大中周朝瑞袁化中深盟固結招權納賄
罔上行私黨護熊廷弼夥壞封疆鐵案既定猶
貪其重賂力為出脫托汪文言內探消息暗弄
機關遍樹私人布滿津要壞法亂紀欺蔽

朝廷及汪文言事發奸謀畢露自知理屈乃巧借別
樣題目以掩其罪剪所忌而肆其克信口裝誣
毫無影嚮肺肝如見欲蓋彌彰朕言念及此深

切痛恨已將熊廷弼嚴決傳首九邊楊健等雖
追贓身故而顧大章係同惡之人即送法司將
前後事情逐一研審取具招詞從重擬罪

爰書既成就將諸奸罪狀及守正諸臣向來
疏揭并近日屢次明旨俱着史臣編輯成書頒
行天下垂示將來以昭朕孝思據事直書毋得
回護使善惡邪正炳如日星而黨與不得借口
文奸飾非惑衆其傳記小說便着禮部行與各
撫按官嚴加禁止自今以後非有部文不許擅
刊書籍違者着緝事衙門訪獲治以妖言惑衆

之罪不饒

同日

都察院一本積勞成病事奉

聖旨吳之仁巡關無一善狀幾至激變軍心着冠帶
閑住該部知道

同日

北鎮撫司一本遵

旨回話事奉

聖旨顧大章贓銀仍着速追完事不得遲延

同日

兵科吳國華一本直糾貪險部郎事奉

聖旨曹欽程既以力攻群兇況見在陵工督理不必
并求周詩雅熊江作令時大干物議近來屢登
薦舉非緣行賄定是徇情吳國華如何顛倒任
意願是徇私報復周詩雅熊江吳國華都著革
了職為民當差仍追奪誥命該部知道

初九日

原任工部員外馮明瑞一本奸邪顯悖

明旨黨害孤臣事奉

旨吏部知道

同日

兵部一本哨將巡河陷沒事奉

聖旨關門將士糜餉如流平日料理何事一舉輒遭陷沒大貽國耻反啓戎心深可痛恨爾部便馬上差人速催新將楊麒及總督王之臣星馳到任仍移文樞輔統率撫鎮道將諸臣亟修戰守實事毋驚進取虛名至于本兵重任尤宜朝夕儆備中外同心共圖全勝不得徒托空言其失事情節即着都察院差風力御史一員會同巡關御史從實勘明具奏以憑處分該部院知道

同日

大學士顧秉謙等揭帖奉

聖旨是黃衍相素行詭秘心術險邪夤緣視朕躬且
漏禁中語着削了籍為民當差即行驅逐不得
潛住京師仍令緝事衙門不時訪察該衙門知
道

同日

保定巡撫郭尚友一本嚴追貪官賍私事追犯
官趙南星賍銀奉

聖旨是

初十日

兵科陳維新一本派品既已分明事奉

聖旨本內奉旨應陞應起諸臣著作速分別推用不得再遲吏部知道

十二日

吏部一本小人之術漸窮君子之用未究事奉
聖旨趙興邦年志夔著以科道原官起用餘俱依擬
行

同白

戶部一本病勢危篤事奉

聖旨關光託病推諉着冠帶閑住吏部知道

同日

工科虞廷陞一本泰運方新事奉

聖旨欲清仕路須要分別賢奸孫居相力薦李三才為主盟遙結史記事為死友一生朋比害正黨邪都着削了職為民當差仍追奪誥命該部知道

同日

戶科陳序一本直糾大愁事奉

聖旨孫居相身賣東林賄膺節鉞托名問餽銀至二

萬一千有奇又票取黃金九十餘兩俱有印
可據着該撫按提問追贓助工梅之煥以孫居
相為介紹出趙南星之門躐陞巡撫入王安之
幕固結私交及楊漣過麻城盤桓垂涕黨惡異
常併着削了籍為民當差仍追奪誥命該部知
道

同日

御史卓邁一本巨奸之典既正等事奉

聖旨熊廷弼失陷封疆已經傳首周朝瑞楊漣受賄
黨護尚在追贓楊鶴江秉謙夏之令薦赦有據

即係同惡本當重處姑從輕削籍為民當差仍
追奪誥命蘇琰宗合中林一柱力挽兇鋒致遭
排擠俱着以原官起用鄭國禎從重議處該部
知道

同日

吏科黃承昊一本敬循垣臣之職掌事奉

聖旨諸款有裨于政即與覆行南居益倚傍門戶躐
躐閭撫及陞漕撫何遷延不至着削了籍為民
當差仍追奪誥命吏部知道

十五日

御史倪文煥一本君子道長當維其盛事奉
聖旨崔景榮東林的派倚奸細劉保為腹心着削了
職為民仍追奪誥命李徵儀曾未奉旨不准起
用還着該部查核具奏李孔度毗睨邪黨削職
為民夏之令極詆毛文龍幾悞封疆着錦衣衛
差官扭解來京究問吳之瑞吳世科冒濫兵餉
着錦衣衛拿送鎮撫司追贓助工一切私記揭
帖粘通衢者着緝事衙門嚴拿究治不饒

同日

太監魏忠賢一本特蒙

聖恩事奉

聖旨爾素性朴直受知先帝及聖母升遐付託朕躬
登極以來茂著忠勤不辭勞怨特賜印信以褒
元勲永保始終奕世載德覽奏謝知道了該部
知道

同日

刑部一本病故犯官事題本月十一日犯官在
監病故奉

聖旨佟卜年着相視明白責令親人領埋

同日

工部員外曹欽程一本孤臣以忠受謗事奉
聖旨吳國華已有旨了曹欽程心迹自明不必深辯
着照舊供職該部知道

同日

大學士顧秉謙等一本纂修實錄等事奉

聖旨實錄關係萬世信史何得濫用匪人周道登身
居門戶豈堪清要着革了職為民仍追奪誥命
卿等還另推來看該部知道

十八日

戶科吳弘業一本疆場之勝敗事奉

聖旨馬世龍失事已奉屢旨朝廷自有處分吳弘業既有堪代經畧總兵的何不列名舉薦徒以空言塞責姑不究該部知道

同日

刑部一本病故犯官事奉

聖旨顧大章病故着相驗明白責令親人領埋其未完贓銀仍行該撫按嚴提家屬追完具奏

同日

刑部一本直指險臣奸穢事問過徐在中聽吏部都察院另行勘覆

同日

御史練國事一本教捐微俸事奉

聖旨捐俸助建具見急公該部知道

同日

御史智鉞一本小人之伏戎可虞事奉

聖旨解學龍侯恪身作東林鷹犬俱看前籍為民仍
追奪誥命所薦閻鳴泰曹守勲劉澤深着吏部
酌量擢用前旨各舉所知專指閹門經督預儲
備用不得借此泛常舉薦為市恩之媒其趙一
鵬該部降處

二十一日

御史張經一本遵

旨具奏事奉

聖旨張經輕信風聞妄形章奏三番回詔仍是支吾
着削了籍為民當差仍追奪誥命該部知道

二十二日

禮部尚書薛三省一本新命勉承舊職事奉

聖旨仕途誠是壅滯然在吏部時何不條陳門工加
恩原照祖宗舊例諸臣既已廷謝不必瑣瀆

二十三日

二十七日

刑部一本遵奉

聖旨事奉

聖旨楊漣左光斗周朝瑞汪文言兇惡小人目無法紀素與內侍王安互相交結妄希定策首倡移宮賣緣作弊扶同奏啓威逼康妃虧朕孝德又與魏大中袁化中顧大章結成一黨紊亂朝政明知熊廷弼失陷封疆罪在不赦乃敢貪其重賄共與營脫巧言諫免暗邀人心賴九廟神靈罪人斯得誅心定法律當情真雖已病死罔圜

還當戮屍都市姑從輕典以示法外之恩其未
完贓銀已有旨着撫按官嚴提家屬追比伺其
完日待以不孝惠世揚同惡相濟不得獨寬着
錦衣衛差官扭解來京從重究治這招詞問擬
詳明情律允愜便依擬行仍遵屢旨宣付史館
頒行天下以昭朕仁孝平明之治以服天下萬
世人心

二十八日

大學士周如磐一本臣妻在家病故事奉

聖旨覽奏知卿有內戚慎勿過傷調攝四五日即望

入閣贊襄不必給假該部知道

二十九日

錦衣衛千戶王國泰母王氏一本跋扈奸戚欺君背祖事奉

聖旨族兄王升并子國興身叨國戚行兇無賴開出祭葬銀两只圖添造私居毫不增修祖墓嫖飲無分晝夜蔑親視弟并髦背祖欺君大辜寵渥都着削爵為民該部知道

同日

上傳諭工部

諭陵工未完皆因錢糧不敷臣子之義正當上緊接濟早完大事以慰孝思如何通不在意却將急用銀兩徇情冒發皇親郭振明王升兩家墳價原奉明旨止各先給七千兩今郭振明多領過五千三十兩王升多領過四千三十六兩顯是朦朧著工部如數作速催征解赴陵工以濟急需不許仍前怠緩遲悞

同日

刑部一本審錄重囚事奏

聖旨各會審情真着照例會官處決內楊鎬王化貞

高出胡嘉棟等集因失陪封疆擬辟刑書久定
如何又說律有不同詞亦互異顯是開路賣法
仍着列情真數內三覆奏以憑裁奪

同日

御史李燦然一本

聖主念切憂勤事奉

聖旨王國禎奉旨踰年杳不赴任視國事漠不相關
着削了籍為民當差仍追奪誥命儲才選將兵
部何不具覆戶工二部既有事例納粟之路不
可再開該部知道

同日

御史練國事一本收時當有實政事奉

聖旨課實一法誠收時急務以後各衙門于歲終將已完未完從實具奏以憑勸懲即如薊遼總督關係甚重乃推一守制王之臣經年不到成何政體看吏兵二部另推在京堪任的幾員來看

同日

都察院一本請差巡按官員事奉

聖旨巡按宣大着點的張養素去蔡國用前疏舉薦龐雜着冠帶閑住該部知道

同日

直隸巡按喻思恂一本要地重臣事奉

聖旨呂兆熊總督倉場奉旨已久如何又黃綠保留
復任喻思恂曲徇私情謬稱德政都着冠帶開
住該部知道

同日

南道徐復陽一本部臬之貪肆當懲卿貳之尤
邪有據事奉

聖旨岳元聲貪跡素著屢掛彈章着削了籍為民當
差仍追奪誥命其陳于堯強思余新民并着從

重議處吏部知道

三十日

吏部一本敬陳根本之綱繆事復南京光祿寺
少卿譚鐔致仕

十月初三日

刑部一本遵奉

聖諭事題犯人楊鎬等情真奉

聖旨覽卿奏知道了

初五日

文書房傳出

聖旨誕生皇子文官四品以上武官三品以上官員
俱于初五日起會極門領花初六日簪花披紅
隨朝

初八日

吏部一本新政已肅事 又一本世道幸見清
明事復南京光祿寺少卿文翔鳳吏部郎中謝
上選各降二級調外任俱奉

聖旨是

同日

直隸巡按洪如鍾一本關門之師事奉

聖旨這本說的是事權貴一遠撫宜裁已有旨了喻
安性着改推用劉詔騎射素長邊事亦暢着照
舊供職劉永基以一年主事甄轉僉憲如何還
欲他移着酌議具奏其滿桂趙率教梁柱朝倪
寵李秉誠俱着各守信地悉心防禦毋務虛文
該部知道

初九日

吏科玄默一本病苦難支事奉

聖旨玄默既有疾着冠帶閑住吏部知道

同日

吏部一本遵

旨會議事奉

聖旨是康丕揚校門權相邪媚貪酷久掛察典復圖
起用一削籍未盡其辜還照憲臣犯贓例發邊
遠充軍仍追奪誥命該部院知道

十一日

大學士顧秉謙等揭帖蒙

上傳內閣中書趙守信并錦衣衛千戶趙守恩俱著
革職為民不許潛住京師如違着緝事衙門拏
究已經傳示奏知奉

聖旨覽卿等奏知道了該衙門知道

同日

御史王珙一本治兵理餉事奉

聖旨經畧新簡選將練兵必有一番振刷本兵司農
務要同心協濟相為終始不得擅議陞遷呂濟
作縣狼狽被佗合中糾衆賄賂親大中貪緣郎
署奸孽顯然姑念見督工程看冠帶閑住傳宗
阜結黨東林肆毒南國張醇儒串同書役分利
自肥都看革職為民追奪誥命其積棍潘鶴金
錢炯游烈勛岑端石皆數匿張醇儒處着錦衣

衛嚴拏究問御史何早端方耿直即以原官起用該部知道

十三日

吏部一本缺官事奉

聖旨李養質因瞞年太多前已處過司官如何又朦朧推陞姑不究着另推來看

十七日

御史潘汝貞一本徵臣幸逢等事奉

聖旨朱世守楊一鵬劉策陸完學皆東林遺奸豈得混跡仕路都着削了籍為民當差仍追奪誥命

該部知道

同日

大學士孫承宗一本懇恩乞放事奉

聖旨卿輔弼重臣久勞關塞屢疏請告情詞迫切難以強留經畧到任暫准調理着加特進光祿大夫廕一子與做中書舍人仍遣行人護送馳驛回籍加賜銀一佰兩綵段四表裡大紅坐蟒一襲以示優眷卿還善自調攝以需召用該部知道

同日

御史梁炳一本恭逢帝曆事奉

聖旨新簡經畧到任有自展布如金冠違悞等事公
論難逃何得先以煩言掣肘梁炳始不究其跡
內叅蔡思充著該部議覆

十八日

御史張訥一本

皇嗣應期詔恩頒布事奉

聖旨元詩教等不准添註擬部諸臣三年候考喻思
恂已經罷閑如何違旨續奏且本內薦舉龐維
主欲復閑武閑三場大非國體姑不究該部知

道

十九日

吏部一本巨奸之典刑既正事伏卓邁本奉

聖旨鄭國貞股民肥己怨聲載道既經撫按糾叅閑
住未盡其辜還着革職為民追奪誥命永不叙
用

同日

御史徐卿伯一本特糾奸險事奉

聖旨劉策已有旨了張我續援黔追遛糜餉百萬奉
旨查勘已經半年何以停閣不報擬奏嚴發妖

僧意欲何為着行該撫按作速勘明具奏以憑
處分該部知道

二十日

東廠一本訪據事奉

聖旨吳懷賢恃富逞兇打死多命營脫逃京賄買汪
文言引援左光斗魏大中門下結為死黨夤緣
題授史館冠帶監生時將旨意漏傳却又妄談
朝政侈口翻局親書現存供稱有據着錦衣衛
拏送鎮撫司嚴究具奏

二十二日

吏部一本見工急缺監督事奉

聖旨王陞不准改註着另推來看

二十五日

兵部主事徐日久一本奉

命贊畫事奉

聖旨經畧到關灼見情形曲直自然奏請定奪况封疆所係不小徐日久如何逞臆妄奏搖撼軍心且詞語傲慢甚無人臣禮着削了職為民當差仍追奪誥命該部知道

同日

刑部一本按遼罪狀久明事奉

聖旨方震孺身任監軍經撫不和不能上疏糾劾以致封疆失陷棄師逃走當與熊廷弼同罪原叅
贓私潞紬百疋羸負參貂如何又行減少君前
臣名已有屢旨何得不遵原問事官御史顯是
賣法市恩姑不究還着照數嚴追從重另擬具
奏

二十七日

南科袁玉佩一本天下有不容塗飾之功事奉
聖旨趙昌胤着削了職并世廕為民當差該衙門知

道

二十九日

刑部一本病故犯官事奉

聖旨陶朗先病故着委官相視明白責令親人殮埋
其未完贓銀着該撫按官嚴提家屬追完具奏
同日

尚寶司少卿劉志選一本

皇考信史已定事奉

聖旨這本說的是孫慎行紅丸一疏借題報復已有
旨削奪了劉志選前后二疏宣付史館以備採

錄該部知道

十一月初六日

內傳奉

上傳與吏兵二部遼撫奉旨裁革喻安性即當謝事
聽候改用如何放炮開門

初七日

大學士周如璧一本臣病日加痊可無期事奉
聖旨卿簡任方新賞襄伊始如何三疏請告情詞迫
切難以強留暫准調理遣行人護送馳驛回籍
加賜銀一百兩綵段四表裏以示優眷該部知

道

同日

吏部一本誥勅事奉

聖旨陳子壯并父陳熙昌依傍門戶豈可並列要津

且試錄內有屬詞權英主覽權等語顯屬

旁都着劑陳熙昌書云命其特

繼祚等俱准誥勅撰文

初八日

刑部一本獄房失火事奉

旨園扉重地屢旨戒嚴火燭重事林咨益疎玩失

事着降三級調外任堂上官不行申飭反稱恩
夜在公成何政體姑不究李如禎身犯重辟却
又不加小心并典獄官吏痛責示懲

初十日

南道李時馨一本欲清吏治事奉

聖旨張我績已有旨了着速勘具奏能明遇黨邪蔽
憲削職未盡其辜仍追奪誥命着該撫按提問
追贓湏之考素有邊才當徐光啓練兵時具薦
不用后因兩朝登極贊襄大禮得起陞南尚寶
復被東林叅論告病不出今始到京隨奉差以

去言官風聞不真還着吏部從公酌議該部知道

十三日

錦衣衛一本緝獲事奉

聖旨劉鐸身出正途心懷偏黨譏切時政侈口妄言既有詩句圖書証憑着錦衣衛差的當官旗扭解來京與妖僧本福對理該部知道

十五日

錦衣衛一本緝獲事差百戶傅德相前往揚州等處拏劉鐸扭解來京去訖奉

聖旨知道了

二十三日

北鎮撫司一本君子道長事奉

聖旨夏之令不惟辯言亂政幾悞封疆且其巡城時
封鎖當舖搜索資財恣行貪暴贓私狼籍携家
人入署大乖憲體許顯純如何一槩含糊還着
嚴究追贓具奏

二十五日

刑部主事彭參一本東林黨蔽事奉

聖旨彭參原係左光斗私人見其事欺反借題解釋

前疏留中如何又來瀆奏併陳鑣徐日升都着
削了籍為民當差仍追奪誥命該部知道

同日

御史王時英一本直糾邪臣事奉

聖旨劉可法厚結趙南星璫陞浙撫唐暉貪婪不檢
倚仗門戶取銓如寄俱着削了籍為民當差仍
追奪誥命胡世賞鎮謀亞卿既經白簡着冠帶
閑住該部知道

同日

御史梁夢環一本經畧之儲等事奉

聖旨唐世濟陰陽反覆閃爍傾危排陷正人主盟邪
黨鑽求崔景榮無缺補官大壞典制本當重處
念部堂官姑看冠帶閑住張潑係袁化中死黨
躍冶速化徐如翰獻媚門戶奸謀叵測都着削
了籍為民當差仍追奪誥命該部知道

同日

御史田景新一本

聖明慮切事奉

聖旨唐世濟作夏嘉遇盟主為左光斗先鋒已有旨
處了王惟儉依附當路朦朧屢轉着冠帶閑住

王孟震巡城不檢居鄉兇橫李守俊貪濫異常
蔣謹貪忍詭秘都着削了籍為民當差仍追奪
誥命該部知道

二十八日

兵部一本開讀事奏錦衣衛田廬耕照先年陸
炳加陞太保堂上食書并南北司東廠理刑官
各加一級俱奉

聖旨是

同日

戶科薛國觀一本聖主虛懷事奉

聖旨薦舉考成皆當責實這條議明切可行以后委任不效的連坐舉主其錢糧未完朦朧考滿陞遷者該各撫按官聽該科一體叅治不許徇私容隱大計追贓及汪心淵等三案定限次年三月內回奏毋得仍前違玩蕭近高奉旨一載繫戀家園豈朝廷任人之意馬之服喬允升都着冠帶閑住該部知道

二十九日

御史袁鯨一本垂念封疆等事奉

聖旨武之望已有旨調用管關廳即宜裁革撫夷海

運二廳揀授科甲照邊俸考選知州王國士貪酷沸騰着革了職為民當差仍追奪誥命

同日

禮科李恒茂一本目擊時艱事奉

聖旨近來仕途壅滯皆因該部不肯任怨裁抑以致

人情日競即如改教不及三年即署營差任意

成何政體吏部司官無缺先推遷轉太速尤非

舊制莊欽隣未滿六選破格先陞圖便已私壞

亂成法孫之益阿附黨人督學無狀都着削了

籍為民當差仍追奪誥命扶克儉臃腫之態朕

所親見著冠帶閑住以後選郎再有不及六選
借教職考選為名擅自陞遷者照莊欽隣例重
處不饒該科記著這本內楊漣左光斗竟不書
名豈奏對之體姑不究

同日

兵部侍郎唐世濟一本面恩事奉

聖旨唐世濟已有旨著冠帶閑住如何又來面恩姑
不究該部知道

同日

錦衣衛指揮張建濟一本微臣治事告竣事奉

聖旨張銓殉節死難朝廷自有公評張道潛領銀造
器銷算不清部覆久羈必已灼見情弊如何輒
生怨望着革職回籍該部知道

同日

尚寶司卿吳殿邦一本孤臣危言事奉

聖旨樊王家逢迎救黨誣害鄉紳借名窩訪打死多
命故入人罪慘殺異常且違禁抽稅至十萬餘
好生貪縱可恨着削了籍為民行廣東巡按御
史并衙蠹李榮吳光提問追贓具奏其無辜羅
織諸人遵恩詔即與查釋陳保泰着該部院從

重議處

同日

刑部一本病故囚犯事奉

聖旨沈有瑞欠贓銀一萬七千兩着行原籍查追保
子沈天挺解部監比朕覽斯奏因憶張慎言周
宗建提問追贓奉旨將及一載如何不見遵行
地方官好生違玩併着嚴追速解限次年正月
回奏

十二月初一日

吏部一本降調官員事奉

聖旨聶心湯貪穢著聞與韓浚爭妾事極可覘察處
浮躁未盡其辜著削了籍為民當差仍追奪誥
命該部知道

同日

御史張樞一本直糾京堂事奉

聖旨陳伯友倚恃表化中周朝瑞而驟躋通顯蕭毅
中借援左先斗顧大章而立擢清華都著削了
職為民當差仍追奪誥命該部知道

初二日

山西巡撫柯臬一本主恩當報事奉

聖旨柯鼎既有疾准回籍調理還候新臣交代該部知道

同日

河南巡撫程紹一本愚臣報主有心事奉

聖旨程紹既有疾准回籍調理還候新臣交代該部知道

同日

刑部一本逮臣賍私已完事奉

聖旨何棟如賍私已完依議發遣

同日

吏科示詩教一本申明兩次京察事奉

聖旨這本說君子小人自是正論魏應嘉着該部議
處具奏韓浚趙士諤已陟華膺杜承式遇盜乞
恤祝耀祖募兵招議所舉未當張惟任端方之
品即宜擢用吏部知道

同日

太僕寺卿潘文一本問政方殷事奉

聖旨潘文既有疾着冠帶開住該部知道

初三日

北鎮撫司一本君子道長事奉

聖旨夏之令賍私狼籍如何止認三千兩顯純明
受囑托徇情姑不究還着盡法嚴追具奏

初四日

御史徐揚先一本匪人難以重任事奉

聖旨鼓鑄不宜信用匪人戎政不可經年曠任並應
舉文球都着冠帶閑住員缺俱另推來用該部
知道

同日

御史陳世倌一本邪臣倖進事奉

聖旨郝名宦結納邪黨鑄名酒杯冰山既傾南樞善

伏羅汝元恃黨入臺全無建白一差未滿營張
京卿王國瑚賣身去輔作府狼籍憲副未幾賄
薄光祿都着削了籍為民當差仍追奪誥命該
部知道

初五日

鎮撫司一本君子道長事奉

聖旨夏之令贓私數多還着勒限嚴追不得寬縱
同日

御史王業浩一本微臣仰荷事奉

聖旨馬並禎要結權黨傾陷正人韓萬象筮仕南都

賣身門戶方有度巧營三窟甘棄四維着削了
籍為民當差仍追奪誥命該部知道

同日

御史曹谷一本仕路日見清明事奉

聖旨郝名宦聶心湯已有旨了楊維新曾于工所著
勞不得風聞苛索洪啓初不必議用該部知道
初六日

刑部尚書李養正一太衰病愈深事奉

聖旨卿職司邦禁倚任方殷何乃屢疏請告情詞迫
切准回籍調理還着馳驛去該部知道

同日

御史陳睿謨一本天道布冬肅之令事奉

聖旨劉廷棟倚藉權黨以刑部郎中改調吏部事屬
破格孫必顯世投門戶罔上行私韋蕃反覆亂
政躡躋華撫都着削了籍為民當差仍追奪誥
命該部知道

初八日

御史倪文煥一本用人為朝廷第一要務事奉
聖旨朱世守已有旨了金世俊為左光斗魏大中私
人實官駐跡有據趙剛盜伐皇陵神樹已經處

分米萬鍾係剛至親又出李三才門下王繼謨
為王之案私黨貪婪素著都着削了籍為民當
差仍追奪誥命金世俊行彼處撫按提問追贓
以助大工該部知道

同日

吏部尚書李宗延一本聞言內愧事奉

聖旨卿秉銓清正倚任方殷乃請告情詞迫切齒疼
腮腫朕所親見准回籍調理還與馳驛去該部
知道

初九日

御史石三畏一本端方等事奉

聖旨周炳謨講筵日久謬為王之宋所薦准令致仕
沈儆劾搜括助建亦有微勞著冠帶閑住張廷
拱鑽謀考選物議沸騰驟躡京卿金憲奧援著
削了籍為民當差仍追奪誥命該部知道

同日

禮科葉有聲一本特糾門戶遺弊事奉

聖旨歐陽調律鋤斥正人倒持察典難禁輒薦舉匪
類擁戴要津都着削了籍為民當差仍追奪誥
命公鵬與李三才為親戚李不避心迹招尤姑

原缺

為民當差仍追奪誥命申用懋薦舉不當着冠帶閑住該部知道

同日

工部一本工緊係重事奉

聖旨橋道現在運石何必再保墊且天寒地凍保墊非時顯是司官計圖侵冒着降三級調外任用堂官料理欠明以後還宜詳慎該部知道

司司

戶科薛國觀一本榆關之局面事奉

聖旨遼左失事皆因文武不和皇祖在時便深以為

慮年來沿襲不改以致用師罔功這本說的是
劉永基貪鄙閃爍垂涎巡撫暗布流言傾陷同
列已有旨削奪了以後開門大小文武各官務
要振起精神同心戮力練兵核餉實講安邊固
圉之策毋得仍循陋轍自取愆尤該部知道

同日

御史盧承欽一本直陳今日之急務事奉

聖旨奸黨宜清調停當戒這本說的是曹珍狎主邪
盟董應舉侵撓鹽政李遇知薦舉匪類獻媚東
林都着削了籍為民當差仍追奪誥命其一切

黨人不拘曾否處分俱著該部院會同九卿科道從公查確集奏將姓名罪狀等節次明旨刊刻成書榜示海內垂鑒將來以保清平之德該部知道

十五日

錦衣衛百戶田志一本遵奉

聖旨事奉

聖旨惠世揚與楊漣左光斗汪文言等交結王安倡起移宮同惡相濟既拿到著送鎮撫司嚴行究問將從前情節逐一供吐具奏

十六日

御史汪裕一本欲清銓法等事奉

聖旨近來選司事體不令堂官預聞直至臨期方纔
畫題用印以致惶惶不及檢查其蒙蔽這本內
事宜即着新任尚書酌議妥當畫一具覆其在
籍郎中貞邪混雜該部從公分別起用外轉罷
斥三等具奏定奪

同日

應天巡撫毛一鷲一本境內奉差等事奉

聖旨吳昌期吳懷賢私書往復譏議朝政着削了籍

為民當差仍追奪誥命其具懷賢家屬速與
結該部知道

十七日

吏部一本缺官事奉

聖旨趙興邦陞吏科都給事中

同日

上傳諭吏工二部李養德照舊供職劉鱗長呂奇策
徐申懋三員遵旨降調

同日

北鎮撫司一本病故犯人事奉

聖旨孟淑孔病故着委官相視明白親人領埋該部知道

同日

御史趙胤昌一本廟謨關係匪輕事奉

聖旨次輔和中任事商確可否朕所鑒知言官不得苛求該部知道

十八日

大學士丁紹軾一本微臣自揣非才事奉

聖旨卿心直口快馬世龍去留既係閣臣公議何又推諉上傳着即出佐理以副朕懷不必以人言

介意該部知道

一十四日

御史陳以瑞一本貞邪不容並立事奏

聖旨著該部酌議具覆

同日

御史何廷樞一本銓規容有未盡事參魏時應

戴澳奉

聖旨這本有裨銓政內參舊銓二臣著酌議具覆吏

部知道

二十五日

吏科趙興邦一本直糾黨邪之臣事奉

聖旨這御史練國事李玄王祚昌霍鎮楊新期五員
雖各有本末但議論既差即係邪黨不必分別
都着削了籍為民當差仍追奪誥命該部知道
同日

御史劉弘光一本

聖朝邪正已明事奉

聖旨談自省以程國祥姻婭濫廁京兆賴良佐以李
月宣死黨冒列清華張篤敬以王圖心腹復張
邪焰都着削了籍為民當差仍追奪誥命邵輔

忠姚宗文劉廷元起用已久著催他速來到任
其餘的該部酌議具覆

同日

督餉侍郎黃泰運一本五年關運事奉
聖旨萬國孚前有旨不准陞遷着冠帶閑住

二十六日

刑部一本遵奉

聖旨事問擬趙南星依律遣戍不准收贖

同日

刑部一本按遼罪狀久明事奉

聖旨方震孺按遼無狀失悞封疆且糜費金錢貪聲
大著必有贓私銀兩不止參紹潞紬還着法司
詳究嚴追具奏不許輕縱寬宥

同日

御史丘兆麟一本鋤強數煩明旨事奉

聖旨趙秉忠久玷鄉評依附權奸躡躑端尹劉芳委
身邪黨芟除正人尚踞藩臬都着削了籍為民
當差仍追奪誥命該部知道

同日

刑科蘇兆先一本除遺挾已事奉

聖旨周希聖營入臺班旋降典史投身邪黨殲跡正
卿將允儀門戶渠魁把持察典雖經例轉公情
未平趙延慶調簡行取與援通神激變營軍流
毒善類都着削了籍為民當差仍追奪誥命該
部知道

二十七日

工部尚書黃克績一本年衰多病事奉

聖旨卿卓識宏猷朕所素知乃請告情詞迫切准回
籍調理以成高尚還與馳驛去該部知道

同日

鎮撫司一本嚴緝奸孽事奉

聖旨惠世揚借汪文言交結王安擅入直房聽其指
使同楊漣左光斗倡議移宮威逼康妃目無先
帝且黨邪害正罪狀非一究問既明着送法司
再加研審依律從重擬罪仍付史館垂示將來
為人臣不忠之戒該部知道

二十八日

御史吳裕中一本朝廷恩禮事奉

聖旨次輔于皇祖初起熊廷弼即首論廷弼蓋已具
先見之明是實心為國今廷弼既服厥罪神人

之所共歡吳裕中乃以鄉戚兒女之情輒敢起
意乘機逞其報復欺肆狂悖詆辱大臣顯是廷
弼一樣肺腸與廷弼尚在何異似此黨亂本當
從重究鞠根由與廷弼同誅姑從輕宥着錦衣
衛拏來午門外着實杖一百棍革了職為民當
差仍追奪誥命該部知道

二十九日

吏部一本鈐奉

聖旨事奉

聖旨岳和聲起都察院右僉都御史整飭薊遼等處

邊備巡撫順天府地方寫勅與他

同日

吏部一本欽奉

聖旨事奉

聖旨周應秋改都察院左都御史

同日

內閣接出

聖旨前覽卿屢疏朕已有溫旨慰留念國家多艱正
賴卿安攘何遽以一二浮言苛語熱起歸心昨
已遣鴻臚寺堂上官宣諭朕意柰何至今未出

况歲暮行大袷禮于太廟屆期卿尚爾偃卧私
居則君臣之大義何在卿可即出佐理副朕佇
望倚毗至意特諭

同日

南道羅萬爵一本敬因長至事奉

聖旨趙彥白所知張我續俱已有旨了其陳楚蔭林
聞詔着吏部即與議覆

同日

南京禮部尚書董其昌一本遵例引年事奉

聖旨卿才猷方茂精力未衰乃請告情詞迫切准回

籍調理着馳驛去該部知道

同日

大學士丁紹軾一本懇乞

天恩寬宥言官事奉

聖旨吳裕中已經處分了卿不必申救該部知道

同日

皇上勅諭總督東廠官旗辦事提督禮儀寶和等店
兼掌惜薪司內官供用庫印務司禮監秉筆太
監魏忠賢恭惟我

祖宗建都于燕歲賴東南漕運以給軍餉故倉儲所

關綦重而出納之際設立戶部司官以監督
蓋慮至周法至密也不謂年久而弊實叢生計
弛而人多欺玩有若管倉主事李柱明者倖濫
甲科潛懷穿窬心如廁中之碩鼠形似梁上之
鴉鵂不思粒粒皆萬姓脂膏竟以累累潤一家
囊橐偷盜之米已盈二千九百三十石之多入
已之贓共有一千八百六十一兩之數茂明條
而故違祖制辱仕版而甚負君恩實人面獸心
真衣冠盜賊官箴大玷憲典謂何況自庚癸頻
呼鼎營甚鉅凡我臣庶各具良心或殫力于捐

資或苦心于節省豈容狡猾之輩肆行乾沒之
奸賴爾忠賢守潔臺冰性貞金石存心國計慮
重邊儲甘勞怨而如飴發臺諫所未糾去貪疾
若堆草剔積蠹于一朝嚴勅還倉痛懲自盜俾
後來任斯職者必人人掀翻窠窟痛洗肺肝簪
笏不代為東陵而困積可收于逝壑倉廩具京
坻之盛六師免枵腹之憂蓋一舉而下警官邪
上關國計通國盡稱為快而朕心洞鑒其赤衷
茂績若斯褒嘉何靳除賜銀幣羊酒外原應第
姪加二級仍賜勅獎勵以彰殊異之榮於戲叩

黃鍾者大叩則大應建殊績者多勩則多酬
謂國典之至公尚罄忠忱于勿替欽哉故諭

同日

御史姚祚端一本欣際維新之盛事奉

聖旨郭允厚孫杰等已有旨留著京卿用姚祚端如
何不遵又來瀆擾姑不究該部知道

同日

吏部一本缺官事奉

聖旨閻鳴泰原係經畧之用戎政協理著另推四五
員來用

同日

吏部一本銓規容有未盡事復御史何廷樞奏
南京通政使魏時應冠帶閑住奉

聖旨是

同日

兵部一本降夷事奉

聖旨是劉伯強誘敗果真即屬奸細着該部審確正
法本內噬臍臍字錯寫口字旁着改正行司官
慢不經心姑不究

同日

刑科潛士聞一本直糾不檢之臣事奉

聖旨曹欽程不檢敗羣着削了籍為民當差仍追奪
誥命其領過陵工神木廠二項銀兩務要銷算
用過若干見存若干交割明白方許回籍該衙
門知道

同日

吏部一本欲清銓法事奉

聖旨劉國縉曾廉費帑金被人叅論不准起用
同日

吏部一本降調官員事奉

聖旨劉鱗長奉旨降調曾幾何時而遽行補官顯屬
鑽刺着削了籍為民當差仍追奪誥命

同日

上傳與吏部都察院犯官王之寀周宗建張慎言熊
明遇方大任等及已故陶朗先楊漣左光斗顧
大章等家屬奉旨行彼處撫按提問追贓如何
久不回報顯屬違玩還着移文各省直勒限速
解以助大工

同日

吏部一本敬因長至嵩呼事復陳楚產等致仕

原缺

廼有乘官庭倉卒之際遂懷傾危陷害之謀搆
朝家骨肉之嫌自為富貴功名之地其為亂臣
賊子可勝誅哉洪惟我

皇祖神宗顯皇帝早建元良式端國本父慈子孝原
無間然而奸人王之寀何士晉魏大忠翟鳳翀
魏光緒張鵬雲等乃借挺擊以邀首功我

皇考光宗貞皇帝一月御天千秋稱聖因哀得疾純
孝彌彰而奸人孫慎行張問達薛文周周希令
張慎言沈惟炳等乃借紅丸以快私怨迨

皇考賓天朕躬續緒父子承繼正統相傳而奸人楊

漣左光斗惠世揚周嘉謨周朝瑞高攀龍等又
借移宮以貪定策之勲而希非望之福將憑几
之遺言委諸草莽以待封之宮春視若寇仇臣
子之分謂何敬忠之義安在幸天牖朕衷仰承
先志康妃皇妹恩禮有加而守正諸臣凡因三
案被誣者皆次第賜環布列有位嘉言罔伏朝
政肅清特允部院科道諸臣之請將節次明旨
并諸臣正論命史臣編緝成書頒行天下使
三朝慈孝燦然大明天下萬世無所疑惑其凡
例體裁一倣明倫大典故事即于新春開館纂

修特命輔臣顧秉謙丁紹軾黃立極馮銓為
裁官施鳳來孟紹虞楊景辰姜逢元曾楚卿為
副總裁官徐紹吉謝啓光余煌朱繼祚張紳華
琪芳吳孔嘉吳士元楊世芳為纂修官喬煒秦
之垣李桐為謄錄官鄭崇光姜雲龍為收掌官卿
等受茲委任湏同心協力殫精研思採集周詳
持議明覈凡係公論一切訂存其群奸邪說亦
量行摘錄後加史官斷案以昭是非之實務在
早完書成之日名曰三朝要典以仰慰

皇祖皇考在天之靈用副朕覲光揚烈之意欽哉故

諭

鎮撫司一本病故犯人事奉

聖旨劉鸞夏之令病故看委官相視明白親人領埋其夏之令贓銀一萬二千六十餘兩并該撫按嚴提家屬追比限文到月以裏如數解部以助大工不得違悞取罪該部院知道

御史曾應瑞一本歲序方始事奉

聖旨疏叅范鳳翼姜習孔孫紹統傅梅吳鳴虞俱係邪黨着削了籍為民當差仍追奪誥命該部知道